

新
唐
書

二

蘇氏藏書

本紀第五

翰林學士兼龍圖閣學

敕撰

書

史館脩撰

書

睿宗玄真大聖大興孝皇帝諱旦高宗第八子也始封殷王領冀州大都督單于大都護長而溫恭好學通詁訓工草隸書徙封豫王又封冀王累遷右金吾衛大將軍洛州牧徙封相王復封豫王武后廢中宗立爲皇帝其改國號周以爲皇嗣居于東宮中宗自房州還復爲皇太子武后封皇嗣爲相王授太子右衛率累遷右羽林衛大將軍并州牧安北大都護諸道元帥中宗復位進號安國相王景雲元年六月壬午韋皇后弑中宗矯詔立溫王重茂爲皇太子以刑部尚書裴談工部尚書張錫同中書門下三品吏部尚書張嘉福中書侍郎岑羲吏部侍郎崔湜同中書門下平章事發諸府兵五萬屯京師以韋溫摠知內外兵馬甲申乃發喪又矯遺詔自立爲皇太后皇太子即皇帝位以睿宗參謀政事大赦

改元曰唐隆太后臨朝攝政罷睿宗參謀政事以爲太尉封嗣雍
王守禮爲邠王壽春郡王成哭宋王丁亥溫王妃陸氏爲皇后壬
辰紀處訥張嘉福岑羲持節巡撫關內河南北庚子臨淄郡王隆
基率萬騎兵入北軍討亂誅韋氏安樂公主及韋巨源馬秦客駙
馬都尉武延秀光祿少卿楊均辛丑睿宗奉皇帝御安福門大赦
賜文武官階勳爵免天下歲租之半進封隆基爲平王朝邑尉劉
幽求爲中書舍人苑惣監鍾紹京爲中書侍郎參知機務壬寅紹
京及黃門侍郎李日知同中書門下三品紀處訥韋溫宗楚客將作
大匠宗晉卿司農卿趙履溫伏誅貶汴王邕爲沁州刺史蕭至忠
許州刺史韋嗣立宋州刺史趙彥昭終州刺史崔湜華州刺史癸
卯太白晝見平王隆基同中書門下三品鍾紹京行中書令張嘉
福伏誅甲辰安國相王即皇帝位于承天門大赦長流長任及流
人未達者還之賜内外官階爵復重茂爲溫王乙巳鍾紹京罷丙
午太常少卿薛稷爲黃門侍郎參豫機務丁未立平王隆基爲皇

太子復則天大聖皇后號曰天后戊申許州刺史姚元之爲兵部尚書同中書門下三品韋嗣立蕭至忠爲中書令趙彥昭爲中書侍郎崔湜爲吏部侍郎同中書門下平章事七月庚戌進封衡陽郡王成義爲申王巴陵郡王隆範岐王彭城郡王隆業薛王癸丑兵部尚書崔日用爲黃門侍郎參豫機務丁巳洛州長史宋璟檢校吏部尚書同中書門下三品岑義罷壬戌貶蕭至忠爲晉州刺史韋嗣立許州刺史趙彥昭宋州刺史張錫絳州刺史崔湜罷丙寅貶李嶠爲懷州刺史姚元之兼中書令蘇瓌爲尚書左僕射丁卯唐休璟張仁亶罷己巳大赦改元賜內外官及子爲父後者勳一轉崔日用薛稷罷乙亥廢崇恩廟吳陵順陵追廢皇后韋氏爲庶人安樂公主爲勃逆庶人八月庚寅譙王重福及汴州刺史鄭愔反伏誅癸巳罷墨敕斜封官貶裴談爲蒲州刺史九月辛未太子少師致仕唐休璟爲朔方道行軍大總管以備突厥十月乙未追號天后曰大聖天后癸卯出義宗于太廟十一月戊申姚元之

爲中書令己酉葬孝和皇帝于定陵壬子蘇瓌韋安石罷宋王成器爲尚書左僕射丁卯赦靈駕所過己巳宋王成器爲司徒

二年正月己未太僕卿郭元振中書侍郎張說同中書門下平章事甲子徙封重茂爲襄王乙丑追冊妃劉氏竇氏爲皇后二月丁丑皇太子監國甲申貶姚元之爲申州刺史宋璟楚州刺史丙戌太子少保韋安石爲侍中劉幽求罷復墨敕斜封官辛卯禁屠三月癸丑作金仙玉眞觀四月甲申韋安石爲中書令宋王成器罷辛卯李日知爲侍中壬寅大赦賜文武官階勲爵民酺三日甲辰作玄元皇帝廟五月庚戌復吳陵順陵置官屬壬戌殿中監竇懷貞爲左御史臺大夫同中書門下平章事八月乙卯大赦賜酺三日丁巳皇太子釋奠于國學庚午韋安石爲尚書左僕射同中書門下三品九月乙亥竇懷貞爲侍中十月甲辰吏部尚書劉幽求爲侍中右散騎常侍魏知古太子詹事崔湜爲中書侍郎同中書門下三品中書侍郎陸象先同中書門下平章事韋安石李日知

郭元振實懷貞張說罷十二月丁未作潑寒胡戲

先天元年正月辛未享于太廟甲戌并汾絳三州地震辛巳有事于南郊戊子耕籍田己丑大赦改元曰太極賜内外官階爵民酺五日版授九十以上下州刺史八十以上上州司馬辛卯幸安福門觀酺三日夜壬辰陸象先同中書門下三品乙未戶部尚書岑羲左御史臺大夫實懷貞同中書門下三品二月丁巳皇太子釋奠于國學是春旱五月戊寅有事于北郊辛巳大赦改元曰延和賜内外官陪禮者勳一轉民酺五日六月癸丑岑羲為侍中乙卯追號大聖天后為天后聖帝辛酉刑部尚書郭元振為朔方道行軍大總管以伐突厥甲子幽州都督孫佺左驍衛將軍李楷洛左威衛將軍周以悌及奚戰于冷陁山敗績七月辛未彗星入于太微兵部尚書李迥秀為朔方道後軍大總管乙亥實懷貞為尚書右僕射平章軍國重事己卯幸安福門觀樂三日而止丙戌以旱減膳八月庚子立皇太子為皇帝以聽小事自尊為太上

皇以聽大事壬寅追號天后聖帝爲聖后甲辰大赦改元賜内外官及五品以上子爲父後者勲爵民酺五日丁未立皇太子妃王氏爲皇后戊申封皇帝子嗣直爲郟王嗣謙郢王己酉宋王成器爲司徒庚戌竇懷貞爲尚書左僕射劉幽求守尚書右僕射同中書門下三品魏知古爲侍中崔湜檢校中書令戊午流劉幽求于封州九月丁卯朔日有食之甲午封皇帝子嗣昇爲陝王十月辛卯獵于驪山十一月丁亥詔遣皇帝巡邊甲午幽州都督宋璟爲左軍大摠管并州長史薛訥爲中軍大摠管兵部尚書郭元振爲右軍大摠管

二年正月乙亥吏部尚書蕭至忠爲中書令二月追作先天元年酺六月辛丑以雨霖避正殿減膳丙辰郭元振同中書門下三品七月甲子大赦乙丑詔歸政于皇帝開元四年六月崩于百福殿年五十五諡曰大聖聖皇帝天寶十三載增諡聖具大聖大興孝皇帝

玄宗至道大聖大明孝皇帝諱隆基睿宗第三子也母曰昭成皇后竇氏性英武善騎射通音律曆象之學始封楚王後爲臨淄郡王累遷衛尉少卿潞州別駕景龍四年朝于京師遂留不遣庶人韋氏已弑中宗矯詔稱制玄宗乃與太平公主子薛崇簡尚衣奉御王崇暉公主府典籤王師虔朝邑尉劉幽求苑摠監鍾紹京長上折衝麻嗣宗押萬騎果毅葛福順李仙舟道士馮處澄僧普潤定策討亂或請先啓相王玄宗曰請而從是王與危事不從則吾計失矣乃夜率幽求等入苑中福順仙舟以萬騎兵攻玄武門斬左羽林將軍韋播中郎將高嵩以徇左萬騎由左入右萬騎由右入玄宗率摠監羽林兵會兩儀殿梓宮宿衛兵皆起應之遂誅韋氏黎明馳謁相王謝不先啓相王泣曰賴汝以免不然吾且及難乃拜玄宗殿中監兼知內外閑廐檢校隴右羣牧大使押左右萬騎進封平王同中書門下三品睿宗即位立爲皇太子景雲三年監國聽除六品以下官延和元年星官言帝坐前星有變睿宗曰傳德

避災吾意決矣七月壬辰制皇太子宜即皇帝位太子惶懼入請
睿宗曰此吾所以荅天戒也皇太子乃御武德殿除三品以下官八
月庚子即皇帝位先天元年十月庚子享于太廟大赦

開元元年正月辛巳皇后親蠶七月甲子太平公主及岑義蕭至
忠竇懷貞謀反伏誅乙丑始聽政丁卯大赦賜文武官階爵庚午
洸崔湜于竇州甲戌毀天樞乙亥尚書右丞張說檢校中書令庚
辰陸象先罷八月癸巳劉幽求爲尚書右僕射知軍國大事壬寅
宋王成器爲太尉申王成義爲司徒邠王守禮爲司空九月丙寅
宋王成器罷庚午劉幽求同中書門下三品張說爲中書令十月
姚雋蠻寇姚州都督李蒙死之己亥幸溫湯癸卯講武于驪山洸
郭元振于新州給事中唐紹伏誅免新豐求歲稅賜從官帛甲辰
獵于渭川同州刺史姚元之爲兵部尚書同中書門下三品乙巳至
自渭川十一月乙丑劉幽求兼侍中戊子羣臣上尊號曰開元神武
皇帝十二月庚寅大赦改元賜內外官勳改中書省爲紫微省門

下省爲黃門省侍中爲監甲午吐蕃請和己亥禁潑寒胡戲壬寅
姚崇兼紫微令癸丑劉幽求罷貶張說爲相州刺史甲寅黃門侍
郎盧懷慎同紫微黃門平章事

二年正月壬午以關內旱求直諫停不急之務寬繫囚祠名山大
川葬暴骸甲申并州節度大使薛訥同紫微黃門三品以伐契丹
二月壬辰避正殿減膳徹樂突厥寇北庭都護郭虔瓘敗之己酉
慮囚三月己亥磧西節度使阿史那獻執西突厥都擔四月辛未
停諸陵供奉鷹犬五月辛亥魏知古罷六月京師大風拔木甲子
以太上皇避暑徙御大明宮七月乙未焚錦繡珠玉于前殿戊戌
禁采珠玉及爲刻鏤器玩珠繩帖綰服者廢織錦坊庚子薛訥及
奚契丹戰于灤河敗績丁未襄王重茂薨追無爲皇帝八月壬戌
禁女樂乙亥吐蕃寇邊薛訥攝左羽林軍將軍爲隴右防禦大使
右驍衛將軍郭知運爲副以伐之九月庚寅作興慶宮丁酉宴京師
侍老于含元殿庭賜九十以上几杖八十以上鳩杖婦人亦如之賜於

其家戊申幸溫湯十月戊午至自溫湯甲子薛訥及吐蕃戰于武階敗之十二月乙丑封子嗣真爲鄆王嗣初鄂王嗣立鄂王

三年正月丁亥立郢王嗣謙爲皇太子降死罪洙以下原之賜酺三日癸卯盧懷慎檢校黃門監二月辛酉赦囚非惡逆造僞者四月庚申突厥部三姓葛邏祿來附右羽林軍大將軍薛訥爲源川鎮軍大揔管涼州都督楊執一副之右衛大將軍郭虔瓘爲朔川鎮軍大揔管并州長史王駿副之以備突厥五月丁未以旱錄京師囚戊申避正殿減膳七月庚辰朔日有食之十月辛酉雋州蠻寇邊右驍衛將軍李玄道伐之壬戌薛訥爲朔方道行軍大揔管太僕卿呂延祚靈州刺史杜賓客副之癸亥如鄆赦所過徒罪以下賜侍老九十以上及篤疾者物甲子如鳳泉湯戊辰降大理繫囚罪十一月己卯至自鳳泉湯乙酉幸溫湯丁亥相州人崔子岳反伏誅甲午至自溫湯乙未禁白衣長髮會十二月乙丑降鳳泉湯所過死罪以下

四年正月戊寅朝太上皇于西宮二月丙辰幸溫湯辛酉吐蕃寇
松州廓州刺史蓋思貴伐之丁卯至自溫湯癸酉松州都督孫仁
獻及吐蕃戰敗之六月甲子太上皇崩辛未京師華陝二州大風
拔木癸酉大武軍子將郝靈佺殺突厥默啜七月丁丑吐蕃請和
丁酉洛水溢八月辛未奚契丹降十月庚午葬大聖真皇帝于橋
陵十一月己卯盧懷慎罷丁亥遷中宗于西廟丙申尚書左丞源乾
曜爲黃門侍郎同紫微黃門平章事十二月乙卯定陵寢殿火丙
辰幸溫湯乙丑至自溫湯閏月己亥姚崇源乾曜罷刑部尚書宋
璟爲吏部尚書兼黃門監紫微侍郎蘇頌同紫微黃門平章事
五年正月癸卯太廟四室壞遷神主于太極殿素服避正殿輟視
朝五日己酉享于太極殿辛亥如東都戊辰大霧二月甲戌大赦
賜從官帛給復河南一年免河南北蝗水州今歲租三月丙寅吐
蕃請和四月甲申毀拜洛受圖壇己丑子嗣一卒五月丙辰詔公
侯子孫襲封七月壬寅隴右節度使郭知運及吐蕃戰敗之九月

壬寅復紫微省爲中書省黃門省爲門下省監爲侍中十月戊寅祔神主于太廟甲申命史官月奏所行事

六年正月辛丑突厥請和二月壬辰朔方道行軍大總管王晙伐突厥六月甲申漚水溢八月庚辰以旱慮囚十月癸亥賜河南府懷汝鄭三州父老帛十一月辛卯至自東都丙申享于太廟元皇帝以上三祖枝孫失官者授五品京官皇祖妣家子孫在選者甄擇之免知頓及旁州供承者一歲租稅乙巳改傳國璽曰寶是月突厥執單于副都護張知運

七年五月己丑朔日有食之素服徹樂減膳中書門下慮囚六月戊辰吐蕃請和閏七月辛巳以旱避正殿徹樂減膳甲申慮囚八月丙戌慮囚九月甲戌徙封宋王憲爲寧王十月作義宗廟于東都辛卯幸溫湯癸卯至自溫湯十二月乙亥皇太子入學齒胄賜陪位官及學生帛

八年正月辛巳宋璟蘇頌罷京兆尹源乾曜爲黃門侍郎并州大都

督府長史張嘉貞爲中書侍郎同中書門下平章事二月戊戌子
敏卒三月甲子免水旱州逋負給復四鎮行人家一年五月丁卯
源乾曜爲侍中張嘉貞爲中書令六月庚寅洛瀍穀水溢九月
突厥寇甘源涼州都督楊敬述及突厥戰敗績丙寅降京城囚罪
杖以下原之壬申契丹寇邊王晙檢校幽州都督節度河北諸軍大
使黃門侍郎韋抗爲朔方道行軍大揔管以伐之甲戌中書門下慮
囚十月辛巳如長春宮壬午獵于下邳庚寅幸溫湯十一月乙卯
至自溫湯

九年正月括田丙寅幸溫湯乙亥至自溫湯二月丙戌突厥請和
丁亥免天下七年以前逋負四月庚寅蘭池胡康待賓寇邊五月
庚午原見囚死流罪隨軍効力徒以下未發者七月己酉王晙執
康待賓八月蘭池胡康願子寇邊九月乙巳朔日有食之癸亥天
兵軍節度大使張說爲兵部尚書同中書門下三品十一月庚午
大赦賜文武官階爵唐隆先天實封功臣坐事免若死者加贈賜

民鬴三日十二月乙酉幸溫湯壬辰至自溫湯是冬無雪

十年正月丁巳如東都二月丁丑次望春頓賜從官帛四月己亥張說持節朔方軍節度大使五月戊午突厥請和辛酉伊汝水溢閏月壬申張說巡邊六月丁巳河決博棣二州七月庚辰給復遭水州丙戌安南人梅叔鸞反伏誅九月張說敗康願子于木盤山執之己卯京兆人權梁山反伏誅癸未吐蕃攻小勃律北庭節度使張孝嵩敗之十月甲寅如興泰宮獵于上宜川庚申如東都十二月突厥請和

十一年正月丁卯降東都囚罪杖以下原之己巳如并州降囚罪徒以下原之賜侍老物庚辰次潞州赦囚給復五年以故第爲飛龍宮辛卯次并州改并州爲北都癸巳赦太原府給復一年下戶三年元從家五年版授侍老八十以上上縣令婦人縣君九十以上上州長史婦人郡君百歲以上上州刺史婦人郡夫人二月己酉賤張嘉貞爲幽州刺史壬子如汾陰祠后土賜文武官階勳爵

帛癸亥張說兼中書令三月辛未至自汾陰免所過今歲稅赦京城四月甲子張說爲中書令吏部尚書王晙爲兵部尚書同中書門下三品五月乙丑復中宗于太廟己丑王晙持節朔方軍節度大使辛卯遣使分巡天下六月王晙巡邊八月戊申追號宣皇帝曰獻祖光皇帝曰懿祖十月丁酉幸溫湯作溫泉宮甲寅至自溫湯十一月戊寅有事于南郊大赦賜奉祠官階勳爵親王公主一子官高年粟帛孝子順孫終身勿事天下酺三日京城五日十二月甲午如鳳泉湯戊申至自鳳泉湯庚申貶王晙爲蘄州刺史十二年四月壬寅詔傍繼國王禮當廢而屬近者封郡王七月己卯廢皇后王氏爲庶人十月庶人王氏卒十一月庚午如東都庚辰溪州首領覃行章反伏誅辛巳申王攜薨閏十二月丙辰朔日有食之

十三年正月戊子降死罪流以下原之遣使宣慰天下壬子葬朔方隴右河西戰亡者三月甲午徙封郾王潭爲慶王陝王浚忠王

鄧王洽棣王鄼王湜榮王封子浚爲光王濉儀王湮潁王澤永
王清壽王洄延王沐盛王溢濟王九月丙戌罷奏祥瑞十月辛酉
如兗州庚午次濮州賜河南北五百里內父老帛十一月庚寅封
于泰山辛卯禪于社首壬辰大赦賜文武官階勳爵致仕官一
季祿公主嗣王郡縣主一子官諸蕃酋長來會者一官免所過
一歲兗州二歲租賜天下酺七日丙申幸孔子宅遣使以太牢祭
其墓給復近墓五戶丁酉賜徐曹亳許仙豫六州父老帛十二
月己巳如東都

十四年二月邕州獠梁大海反伏誅四月丁巳戶部侍郎李元紘
爲中書侍郎同中書門下平章事庚申張說罷丁卯岐王範薨六
月戊午東都大風拔木壬戌詔州縣長官言事七月癸未灋水溢
八月丙午河決魏州九月己丑磧西節度使杜暹檢校黃門侍郎
同中書門下平章事十月甲寅太白晝見庚申如廣成湯己巳如
東都十二月丁巳獵于方秀川

十五年正月辛丑河西隴右節度使王君奭及吐蕃戰于青海敗之七月甲戌震興教門觀災庚寅洛水溢己亥降都城囚罪徒以下原之八月澗穀溢毀澠池縣己巳降天下死罪嶺南邊州流人徒以下原之九月丙子吐蕃寇瓜州執刺史田元獻閏月庚子寇安西副大都護趙頤貞敗之庚申回紇襲甘州王君奭死之十月己卯至自東都十一月丁卯獵于城南十二月乙亥幸溫泉宮丙戌至自溫泉宮

十六年正月壬寅趙頤貞及吐蕃戰于曲子城敗之乙卯隴州首領陳行範反伏誅庚申許徒以下囚保任營田辰三月辛丑免營農囚罪七月吐蕃寇瓜州刺史張守珪敗之乙巳隴右節度使張志亮河西節度使蕭肅嵩克吐蕃大莫門城八月辛卯及吐蕃戰于柰連城敗之九月丙午以久雨降囚罪徒以下原之十月己卯幸溫泉宮己丑至自溫泉宮十一月癸巳蕭肅嵩爲兵部尚書同中書門下平章事甲辰弛陂澤禁戊申辛寧王憲第庚戌至自寧王憲第

十二月丁卯幸溫泉宮丁丑至自溫泉宮

十七年二月丁卯雋州都督張審素克雲南昆明城鹽城三月
戊戌張守珪及吐蕃戰于大同軍敗之四月癸亥降死罪流以下原
之乙亥大風震藍田山崩六月甲戌源乾曜杜暹李元紘罷蕭高
兼中書令戶部侍郎宇文融爲黃門侍郎兵部侍郎裴光庭爲中
書侍郎同中書門下平章事九月壬子貶宇文融爲汝州刺史十月
戊午朔日有食之十一月庚寅幸于太廟丙申拜橋陵赦奉先
縣戊戌拜定陵己亥拜獻陵壬寅拜昭陵乙巳拜乾陵戊申至自乾
陵大赦免今歲稅之半賜文武官階爵侍老帛旌表孝子順孫義
夫節婦終身勿事唐隆兩營立功三品以上予一子官免供頓縣
今歲稅賜諸軍行人勲兩轉十二月辛酉幸溫泉宮壬申至自溫
泉宮是冬無雪

十八年正月辛卯裴光庭爲侍中二月丙寅大雨雷震左飛龍殿
災辛未免囚罪杖以下四月乙卯築京師外郭五月己酉奚契丹

附于突厥六月甲子有彗星出于五車癸酉有星孛于畢卯乙亥
灋水溢丙子忠王浚爲河北道行軍元帥壬午洛水溢九月丁巳
忠王浚兼河東道諸軍元帥十月戊子吐蕃請和庚寅如鳳泉湯
癸卯至自鳳泉湯十一月丁卯幸溫泉宮丁丑至自溫泉宮

十九年正月殺灋州別駕王毛仲丙子耕于興慶宮己卯禁捕鯉
魚四月壬午降死罪以下丙申立太公廟六月乙酉大風拔木七
月癸丑吐蕃請和八月辛巳以千秋節降死罪流以下原之十月
丙申如東都十一月乙卯次洛城南賜從官帛是歲楊州穰稻生
二十年正月乙卯信安郡王禕爲河東河北道行軍副元帥以伐
奚契丹二月甲戌朔日有食之壬午降囚罪徒以下原之三月己
巳信安郡王禕及奚契丹戰于薊州敗之五月戊申忠王浚俘奚
契丹以獻六月丁丑浚爲司徒八月辛未朔日有食之九月乙巳渤
海靺鞨寇登州刺史韋俊死之左領軍衛將軍蓋福愼伐之戊辰
以宋滑兗鄆四州水免今歲稅十月壬午如潞州丙戌中書門

下慮巡幸所過囚辛卯赦潞州給復三年賜高年粟帛十一月辛丑如北都癸丑赦北都給復三年庚申如汾陰祠后土大赦免供頓州今歲稅賜文武官階勳爵諸州侍老帛武德以來功臣後及唐隆功臣三品以上一子官民酺三日十二月辛未至自汾陰

二十一年正月丁巳幸溫泉宮二月丁亥至自溫泉宮三月乙巳裴光庭薨甲寅尚書右丞韓休爲黃門侍郎同中書門下平章事閏月癸酉幽州副摠管郭英傑及契丹戰于都山英傑死之四月乙卯遣宣慰使黜陟官吏決繫囚丁巳寧王憲爲太尉薛王業爲司徒五月戊子以皇太子納妃降死罪流以下原之七月乙丑朔日有食之九月壬午封子沔爲信王泚義王淮陳王澄豐王德恒王璇涼王滔深王十月庚戌幸溫泉宮己未至自溫泉宮十二月丁巳蕭肅嵩韓休罷京兆尹裴耀卿爲黃門侍郎中書侍郎張九齡同中書門下平章事

二十二年正月己巳如東都二月壬寅秦州地震給復壓死者家

一年三人者三年四月甲辰降死罪以下甲寅北庭都護劉渙謀反伏誅五月戊子裴耀卿爲侍中張九齡爲中書令黃門侍郎李林甫爲禮部尚書同中書門下三品是日大風拔木六月壬辰幽州節度使張守珪俘奚契丹以獻七月己巳薛王業薨十月甲戌免關內河南八等以下戶田不百畝者今歲租十二月戊子朔日有食之乙巳張守珪及契丹戰敗之殺其王屈烈

二十三年正月乙亥耕藉田大赦侍老百歲以上版授上州刺史九十以上中州刺史八十以上上州司馬賜陪位官勳爵征防兵父母年七十者遣還民酺三日八月戊子免鰥寡惇獨今歲稅米十月戊申突騎施寇邊閏十二月壬午朔日有食之是冬東都人劉普會反伏誅

二十四年正月丙午北庭都護蓋嘉運及突騎施戰敗之四月丁丑降死罪以下五月丙午醴泉人劉志誠反伏誅八月甲寅突騎施請和乙亥汴王璿薨十月戊申京師地震甲子次華州免供頓

州今歲稅賜刺史縣令中上考降兩京死罪流以下原之丁卯至
自東都十一月辛丑東都地震壬寅裴耀卿張九齡罷李林甫兼
中書令朔方軍節度副大使牛仙客爲工部尚書同中書門下三
品十二月戊申慶王琮爲司徒

二十五年三月乙酉張守珪及契丹戰于捺祿山敗之辛卯河西
節度副大使崔希逸及吐蕃戰于青海敗之四月辛酉殺監察御
史周子諒乙丑廢皇太子瑛及鄂王瑤光王琚爲庶人皆殺之十
一月壬申幸溫泉宮乙酉至自溫泉宮十二月丙午惠妃武氏薨
丁巳追冊爲皇后

二十六年正月甲戌潮州刺史陳思挺謀反伏誅乙亥牛仙客爲
侍中丁丑迎氣于東郊降死罪流以下原之以京兆稻田給貧民
禁王公獻珍物賜文武官帛壬辰李林甫兼隴右節度副大使二
月乙卯牛仙客兼河東節度副大使三月丙子有星孛于紫微癸
巳京師地震吐蕃寇河西崔希逸敗之鄯州都督杜希望克其新

城四月己亥有司讀時令降死罪流以下原之五月乙酉李林甫兼河西節度副大使六月庚子立忠王璵爲皇太子七月己巳大赦賜文武九品以上及五品以上子爲父後者勲一轉侍老粟帛加版授免京畿下戶今歲租之半賜民酺三日九月丙申朔日有食之庚子益州長史王昱及吐蕃戰于安戎城敗績十月戊寅幸溫泉官壬辰至自溫泉官

二十七年正月壬寅榮王琬巡按隴右二月己巳羣臣上尊號曰開元聖文武皇帝大赦免今歲稅賜文武官階爵版授侍老百歲以上下州刺史婦人郡君九十以上上州司馬婦人縣君八十以上縣令婦人鄉君賜民酺五日八月乙亥磧西節度使蓋嘉運敗突騎施于賀邏嶺執其可汗吐火仙壬午吐蕃寇邊河西隴右節度使蕭晃敗之十月丙戌幸溫泉官十一月辛丑至自溫泉官二十八年正月癸巳幸溫泉官庚子至自溫泉官三月丁亥朔日有食之壬子益州司馬章仇兼瓊敗吐蕃克安戎城五月癸卯吐

蕃寇安戎城兼瓊又敗之十月甲子幸溫泉宮以壽王妃楊氏爲道士號太真戊辰以徐泗二州無蠶免今歲稅辛巳至自溫泉宮十一月牛仙安罷朔方河東節度副大使

二十九年正月癸巳幸溫泉宮丁酉立玄元皇帝廟禁厚葬庚子至自溫泉宮五月庚戌求明道德經及莊列文子者降死罪誅以下原之七月乙亥伊洛溢九月丁卯大雨雪十月丙申幸溫泉宮戊戌遣使黜陟官吏十一月庚戌邠王守禮薨辛酉至自溫泉宮己巳雨木冰辛未寧王憲薨追冊爲皇帝及其妃元氏爲皇后十二月癸未吐蕃陷石堡城

天寶元年正月丁未大赦改元詔京文武官材堪刺史者自舉賜侍老八十以上粟帛九品以上勳兩轉甲寅陳王府參軍田同秀言玄元皇帝降于丹鳳門通衢二月丁亥羣臣上尊號曰開元天寶聖文武皇帝辛卯享玄元皇帝于新廟甲午享于太廟丙申合祭天地于南郊大赦侍老加版授賜文武官階爵改侍中爲

左相中書令爲右相東都爲東京北都爲北京州爲郡刺史爲太守七月癸卯朔日有食之辛未牛仙客薨八月丁丑刑部尚書李適之爲左相十月丁酉幸溫泉宮十一月己巳至自溫泉宮十二月戊戌隴右節度使皇甫惟明及吐蕃戰于青海敗之庚子河西節度使王倕克吐蕃漁海遊弈軍朔方軍節度使王忠嗣及奚戰于紫乾河敗之遂伐突厥是冬無冰

二年正月乙卯作昇仙宮丙辰加號玄元皇帝曰大聖祖三月壬子享于玄元宮追號大聖祖父周上御大夫敬曰先天太皇咎繇曰德明皇帝涼武昭王曰興聖皇帝改西京玄元宮曰太清宮東京曰太微宮四月己卯皇甫惟明克吐蕃洪濟城六月甲戌震東京應天門觀災十月戊寅幸溫泉宮十一月乙卯至自溫泉宮十二月壬午海賊吳令光寇永嘉郡是冬無雪

三載正月丙申改年爲載降死罪流以下原之辛丑幸溫泉宮辛亥有星隕于東南二月庚午至自溫泉宮丁丑河南尹裴敦復晉

陵郡太守劉同昇南海郡太守劉巨鱗討吳令光閏月令光伏誅三月壬申降死罪流以下原之八月丙午拔悉蜜攻突厥殺烏蘇米施可汗來獻其首十月甲午幸溫泉宮十一月丁卯至自溫泉宮十二月癸丑祠九宮貴神于東郊大赦詔天下家藏孝經賜文武官階爵侍老粟帛民酺三日

四載正月丙戌王忠嗣及突厥戰于薩河內山敗之三月壬申以外孫獨孤氏女爲靜樂公主嫁于契丹松漠都督李懷節楊氏女爲宜芳公主嫁于奚饒樂都督李延寵八月壬寅立太真爲貴妃九月契丹奚皆殺其公主以叛甲申皇甫惟明及吐蕃戰于石堡城副將褚誨死之十月戊戌幸溫泉宮十二月戊戌至自溫泉宮五載正月乙亥停六品以下員外官三月丙子遣使黜陟官吏四月庚寅李適之罷丁酉門下侍郎陳希烈同中書門下平章事五月壬子朔日有食之七月殺括蒼郡太守韋堅播川郡太守皇甫惟明十月戊戌幸溫泉宮十一月乙巳至自溫泉宮十二月甲戌

殺贊善大夫杜有鄰著作郎王曾左驍衛兵曹參軍柳勣左司禦率府倉曹參軍王脩已右武衛司戈盧寧左威衛參軍徐徵

六載正月辛巳殺北海郡太守李邕淄川郡太守裴敦復丁亥享于太廟戊子有事于南郊大赦流人老者許致仕停立仗鉞賜文武官階爵侍老粟帛民酺三日三月甲辰陳希烈爲左相七月乙酉以旱降死罪流以下原之十月戊申幸華清宮十一月丁酉殺戶部侍郎楊慎矜及其弟少府少監慎餘洛陽令慎名十二月癸丑至自華清宮是歲安西副都護高仙芝及小勃律國戰敗之

七載五月壬午羣臣上尊號曰開元天寶聖文神武應道皇帝大赦免來載租庸以魏周隋爲三恪賜京城父老物人十段七十以上版授本縣令婦人縣君六十以上縣丞天下侍老百歲以上上郡太守婦人郡君九十以上上郡司馬婦人縣君八十以上縣令婦人鄉君賜文武官勳兩轉民酺三日十月庚戌幸華清宮十二月辛酉至自華清宮

八載四月殺咸寧郡太守趙奉璋六月乙卯龍右節度使哥舒翰及吐蕃戰于石堡城敗之閏月丙寅謁太清宮加上玄元皇帝號曰聖祖大道玄元皇帝增祖宗帝后謚羣臣上尊號曰開元天地大寶聖文神武應道皇帝大赦男子七十婦人七十五以上皆給一子侍賜文武官階爵民爲戶者古爵酺三日十月乙丑幸華清宮是月特進何履光率十道兵以伐雲南十二月丁巳幸御史中丞楊釗莊

九載正月己亥至自華清宮丁巳詔以十一月封華嶽三月辛亥華嶽廟災關內旱乃停封五月庚寅慮囚九月辛卯以商周漢爲三恪十月庚申幸華清宮太白山人王玄翼言玄元皇帝降于寶仙洞十二月乙亥至自華清宮是歲雲南繼陷雲南郡都督張虔陀死之

十載正月壬辰朝獻于太清宮癸巳朝享于太廟甲午有事于南郊大赦賜侍老粟帛酺三日丁酉李林甫兼朔方軍節度副大使

安北副大都護已亥改傳國竈員爲承天大寶戊申安西四鎮節度使高仙芝執突騎施可汗及石國王四月壬午劍南節度使鮮于仲通及雲南蠻戰于西洱河大敗績大將王天運死之陷雲南都護府七月高仙芝及大食戰于恒邏斯城敗績八月范陽節度副大使安祿山及契丹戰于吐護督河敗績乙卯廣陵海溢丙辰武庫災十月壬子幸華清宮十一月乙未幸楊國忠第

十一載正月丁亥至自華清宮二月庚午突厥部落阿布思寇邊三月乙巳改尚書省八部名四月乙酉戶部郎中王鐸京兆人邢縉謀反伏誅丙戌殺御史大夫王鉷李林甫罷安北副大都護五月戊申慶王琮薨甲子東京大風拔木六月壬午御史大夫兼劍南節度使楊國忠敗吐蕃于雲南克故洪城十月戊寅幸華清宮十一月乙卯李林甫薨庚申楊國忠爲右相十二月丁亥至自華清宮

十二載五月己酉復魏周隋爲三恪六月阿布思部落降八月申書門下慮囚九月甲寅葛邏祿葉護執阿布思十月戊寅幸華清宮

十三載正月丙午至自華清宮二月壬申朝獻于太清宮加上玄
元皇帝號曰大聖祖高上大道金闕玄元天皇帝癸酉朝享于
太廟增祖宗謚甲戌羣臣上尊號曰開元天地大寶聖文神武證
道孝德皇帝大赦左降官遭父母喪者聽歸賜孝義旌表者勳兩
轉侍老百歲以上版授本郡太守婦人郡夫人九十以上郡長史婦
人郡君八十以上縣令婦人縣君太守加賜爵一級縣令勳兩轉
民醺三日丁丑楊國忠爲司空是日雨土三月隴右河西節度使
哥舒翰敗吐蕃復河源九曲辛酉大風拔木五月壬戌觀醵于勤
政樓北庭都護程千里俘阿布思以獻六月乙丑朔日有食之劍
南節度留後李宓及雲南蠻戰于西洱河死之八月丙戌陳希
烈罷文部侍郎韋見素爲武部尚書同中書門下平章事是秋
灑洛水溢十月乙酉幸華清宮十二月戊午至自華清宮

十四載三月壬午安祿山及契丹戰于潢水敗之五月天有聲于浙
西八月辛卯降死罪流以下原之免今載租庸半賜侍老米十月

庚寅幸華清宮十一月安祿山反陷河北諸郡范陽將何千年
殺河東節度使楊光翹壬申伊西節度使封常清爲范陽平盧
節度使以討安祿山丙子至自華清宮九原郡太守郭子儀爲朔
方軍節度副大使右羽林軍大將軍王承業爲太原尹衛尉卿張
介然爲河南節度採訪使右金吾大將軍程千里爲上黨郡長史
以討安祿山丁丑榮王琬爲東討元帥高仙芝副之十二月丁亥安
祿山陷靈昌郡辛卯陷陳留郡執太守郭納張介然死之癸巳安
祿山陷滎陽郡太守崔無詖死之丙申封常清及安祿山戰于觀
子谷敗績丁酉陷東京留守李憺御史中丞盧弈判官蔣清死
之河南尹達奚珣叛降于安祿山己亥恒山郡太守顏杲卿敗何
千年執之克趙鉅鹿廣平清河河間景城樂安博平博陵上谷文
安信都魏鄴十四郡癸卯封常清高仙芝伏誅哥舒翰持節統領
處置太子先鋒兵馬副元帥守潼關甲辰郭子儀及安祿山將高
秀巖戰于河曲敗之戊申榮王琬薨壬子濟南郡太守李隨單父

尉賁賁濮陽人尚衡以兵討安祿山是月平原郡太守顏真卿饒陽郡太守盧全誠司馬李正以兵討安祿山

十五載正月乙卯東平郡太守嗣吳王祗以兵討安祿山丙辰李隨爲河南節度使以討祿山壬戌祿山陷恒山郡執顏杲卿素履謙陷鄴廣平鉅鹿趙上谷博陵文安魏信都九郡癸亥朔方軍節度副使李光弼爲河東節度副大使以討祿山甲子南陽郡太守魯昂爲南陽節度使率嶺南黔中山南東道兵屯于葉縣乙丑安慶緒寇潼關哥舒翰敗之丁丑具源令張巡以兵討安祿山二月己亥嗣吳王祗及祿山將謝元同戰于陳留敗之李光弼克恒山郡郭子儀出井陘會光弼及安祿山將史思明戰敗之庚子賁賁戰于雍丘死之三月顏真卿克魏郡史思明寇饒陽平原乙卯張巡及安祿山將令狐潮戰于雍丘敗之丙辰殺戶部尚書安思順太僕卿安元貞乙丑李光弼克趙郡四月乙酉北海郡太守賀蘭進明以兵救平原丙午太子左贊善大夫來瑱爲潁川郡太守

兼招討使五月丁巳魯昂及安祿山戰于漵水敗績奔于南陽戊辰嗣號王巨爲河南節度使六月癸未顏真卿及安祿山將素知泰戰于堂邑敗之賀蘭進明克信都丙戌哥舒翰及安祿山戰于靈寶西原敗績是日郭子儀李光弼及史思明戰于嘉山敗之辛卯蕃將火拔歸仁執哥舒翰叛降于安祿山遂陷潼關上洛郡甲午詔親征京兆尹崔光遠爲西京留守招討處置使丙申行在望賢宮丁酉次馬嵬左龍武大將軍陳玄禮殺楊國忠及御史大夫魏方進太常卿楊暄賜貴妃楊氏死是日張巡及安祿山將翟伯玉戰于白沙埭敗之己亥祿山陷京師辛丑次陳倉閑廐使任沙門叛降于祿山丙午次河池郡劍南節度使崔圓爲中書侍郎同中書門下平章事七月甲子次普安郡憲部侍郎房琯爲文部尚書同中書門下平章事丁卯皇太子爲天下兵馬元帥都統朔方河東河北平盧節度使御史中丞裴冕隴西郡司馬劉秩副之江陵大都督永王璘爲山南東路黔中江南西路節度使盛王琦爲廣陵

郡都督江南東路淮南道節度使豐王珙爲武威郡都督河西隴
右安西北庭節度使庚午次巴西郡以太守崔渙爲門下侍郎同
中書門下平章事韋見素爲左相庚辰次蜀郡八月壬午大赦賜
文武官階爵爲安祿山脅從能自歸者原之癸巳皇太子即皇帝
位于靈武以聞庚子上皇天帝誥遣韋見素房琯崔渙奉皇帝冊
于靈武十一月甲寅憲部尚書李麟同中書門下平章事十二月
甲辰永王璘反廢爲庶人至德二載正月庚戌誥求天下孝悌可
旌者甲子劔南健兒賈秀反伏誅三月庚午通化郡言立元皇帝
降五月庚申誥追冊貴嬪楊氏爲皇后七月庚戌行營健兒李季
反伏誅庚午劔南健兒郭千仞反伏誅十月丁巳皇帝復京師以
聞誥降劔南囚罪流以下原之十二月丁未至自蜀郡居于興慶
宮三載上號曰太上至道聖白上天帝上元元年徙居于西內甘露
殿元年建巳月崩于神龍殿年七十八

贊曰睿宗因其子之功而在位不久固無可稱者嗚呼女子之禍於

人者甚矣自高祖至于中宗數十年間再罹女禍唐祚既絕而復續中宗不免其身韋氏遂以滅族立宗親平其亂可以鑒矣而又敗以女子方其勵精政事開元之際幾致太平何其盛也及侈心一動窮天下之欲不足爲其樂而溺其所甚愛忘其所可戒至於竄身失國而不悔考其始終之異其情之相遠也至於如此可不慎哉可不慎哉

本紀第五

本紀第六

唐書六

翰林學士兼龍圖閣學士朝散大夫給事中知制誥吏館脩撰臣歐陽

脩奉

救撰

肅宗文明武德大聖大宣孝皇帝諱亨玄宗第三子也母曰元獻
皇后楊氏初名嗣昇封陝王開元四年爲安西大都護性仁孝好
學玄宗尤愛之遣賀知章潘肅呂向皇甫彬邢璣等侍讀左右十
五年更名浚徙封忠王爲朔方節度大使單于大都護十八年奚
契丹寇邊乃以肅宗爲河北道行軍元帥遣御史大夫李朝隱等
八摠管兵十萬以伐之居二歲朝隱等敗奚契丹於范陽北肅宗
以統帥功遷司徒二十三年又更名璵二十五年皇太子瑛廢死
明年立爲皇太子有司行冊禮其儀有中嚴外辦其服絳紗太
子曰此天子禮也乃下公卿議太師蕭嵩左丞相裴耀卿請改外
辦爲外備絳紗衣爲朱明服乃從之二十八年又更名紹天寶三載
又更名亨安祿山來朝太子識其有反相請以罪誅之玄宗不聽

祿山反十五載玄宗避賊行至馬嵬父老遮道請留太子討賊玄宗許之遣壽王瑁及內侍高力士諭太子太子乃還六月丁酉至渭北便橋橋絕募水濱居民得三千餘人涉而濟遇潼關散卒以爲賊與戰多傷旣而覺之收其餘以涉後軍多沒者次永壽縣吏民稍持牛酒來獻新平郡太守薛羽保定郡太守徐穀聞賊且至皆棄城走己亥太子次保定捕得羽穀斬之辛丑次平涼郡得牧馬牛羊兵始振朔方留後支度副使杜鴻漸六城水陸運使魏少游節度判官崔漪支度判官崔簡金關內鹽池判官李涵河西行軍司馬裴冕迎太子治兵于朔方庚戌次邕寧見大河之險將保之會天大風迴趨靈武七月辛酉至于靈武壬戌裴冕等請皇太子即皇帝位甲子即皇帝位于靈武尊皇帝曰上皇天帝大赦改元至德賜文武官階勳爵版授侍老太守縣令裴冕爲中書侍郎同中書門下平章事甲戌安祿山寇扶風太守薛景仙敗之八月辛卯張巡及安祿山將李廷望戰于雍丘敗之十月辛巳朔日

有食之癸未次彭原郡詔御史諫官論事勿先白大夫及宰相始
鄯善尉度僧尼房琯爲招討西京防禦蒲潼兩關兵馬元帥兵部尚
書王思禮副之南軍入于宜壽中軍入于武功北軍入于奉天辛
卯河南節度副使張巡及令狐潮戰于雍丘敗之辛丑房琯以中
軍北軍及安祿山之衆戰于陳濤斜敗績癸卯琯又以南軍戰
敗績是月遣永王璘朝上皇天帝于蜀郡璘反丹徒郡太守閻敬
之及璘戰于伊婁埭死之十一月辛亥河西地震戊午崔渙爲江南
宣慰使郭子儀率回紇及安祿山戰于河上敗之史思明寇太原
十二月安祿山陷魯東平濟陰三郡戊子給復彭原郡二載安祿
山陷潁川執太守薛原及長史龐堅是歲吐蕃陷雋州嶺南溪獠
梁崇牽陷容州

二載正月永王璘陷鄱陽郡乙卯安慶緒弑其父祿山丙寅河西
兵馬使子孟庭倫殺其節度使周泌以武威郡反乙亥安慶緒將尹
子奇寇睢陽郡張巡敗之二月戊子次于鳳翔李光弼及安慶緒

之衆戰于太原敗之丁酉關西節度兵馬使郭英乂及安慶緒戰于武功敗績慶緒陷馮翊郡太守蕭肅賁死之慶緒將蔡希德寇太原戊戌庶人璘伏誅庚子郭子儀及安慶緒戰于潼關敗之壬寅河西判官崔僈克武威郡孟庭倫伏誅甲辰郭子儀及安慶緒戰于永豐倉敗之大將李韶光王祚死之三月辛酉韋見素裴冕罷憲部尚書致仕苗晉卿爲左相四月戊寅郭子儀爲關內河東副元帥壬午瘞陣亡者庚寅郭子儀及安慶緒將李歸仁戰于劉運橋敗之五月癸丑子儀及慶緒將安守忠戰于清渠敗績丁巳房琯罷諫議大夫張鎬爲中書侍郎同中書門下平章事六月癸未尹子奇寇睢陽丁酉南充郡民何滔執其太守楊齊曾以反劍南節度使盧元裕敗之七月己酉太白經天丁巳安慶緒將安武臣陷陝郡八月丁丑焚長春宮甲申崔渙罷張鎬兼河南節度使都統淮南諸軍事靈昌郡太守許叔冀奔于彭城癸巳大閱閏月甲寅安慶緒寇好時渭北節度使李光進敗之丁卯廣平郡王俶

爲天下兵馬元帥郭子儀副之以朔方安西回紇南蠻大食兵討
安慶緒辛未京畿採訪宣慰使崔光遠及慶緒戰于駱谷敗之行
軍司馬王伯倫戰于苑北死之九月丁丑慶緒陷上黨郡執節度
使程千里壬寅廣平郡王俶及慶緒戰于漕水敗之癸卯復京師
慶緒奔于陝郡尚書左僕射裴冕告太清宮郊廟社稷五陵宣
慰百姓十月戊申廣平郡王俶及安慶緒戰于新店敗之克陝郡
壬子復東京慶緒奔于河北興平軍兵馬使李奐及慶緒之衆戰
于武關敗之克上洛郡吐蕃陷西平郡癸丑安慶緒陷睢陽太守許
遠及張巡鄆州刺史姚閭左金吾衛將軍南霽雲皆死之癸亥
給復鳳翔五載版授父老官遣太子太師韋見素迎上皇天帝于
蜀郡丁卯至自靈武嚮于太廟哭三日己巳關內節度使王思禮
及安慶緒戰于絳郡敗之十一月丙子張錫率四鎮伊西北庭行營
兵馬使李嗣業陝西節度使來瑱河南都知兵馬使嗣吳王祗
克河南郡縣庚子作九廟神主告享于長樂殿十二月丙午上皇

天帝至自蜀郡甲寅苗晉卿爲中書侍郎同中書門下平章事戊午大赦靈武元從蜀郡扈從官三品以上子一子官四品以下一子出身瘞陣亡者致祭之給復其家二載免天下租庸來歲三之一禁珠玉寶鈿平脫金泥刺繡復諸州及官名以蜀郡爲南京鳳翔郡爲西京西京爲中京給復潞州五載并鄧許滑宋五州雍丘好時奉先縣二載益州三載賜文武官階勳爵父老八十以上版授加緋衣銀魚民醵五日廣平郡王俶爲太尉進封楚王苗晉卿爲侍中崔圓爲中書令李麟同中書門下三品進封子南陽郡王係爲趙王新城郡王僅彭王潁川郡王僖兗王東陽郡王佖涇王封子儼爲襄王倓杞王偁召王偁興王偁定王乙丑史思明降王申達奚珣等伏誅

乾元元年正月戊寅上皇天帝御宣政殿授皇帝傳國受命寶符冊號曰光天文武大聖孝感皇帝乙酉出宮女三千人庚寅大閱二月癸卯安慶緒將能元皓以淄青降以元皓爲河北招討使乙

已上上皇天帝冊號曰聖皇天帝丁未大赦改元贈死事及拒僞
命者官成都靈州扈從三品以上子一子官五品以上一子出身
六品以下敘進之免陷賊州三歲稅賜文武官階爵三月甲戌徙
封俶爲成王戊寅立淑妃張氏爲皇后四月辛亥祔神主于太廟
甲寅朝享于太廟有事于南郊乙卯大赦賜文武官階勲爵天下
非租庸母輒役使有能賑貧窮寵以官爵京官九品以上言事二
王三恪子一子官史思明殺范陽節度副使烏承恩以反五月戊
子張鎬罷乙未崔圓李麟罷太常少卿王璵爲中書侍郎同中書
門下平章事七月党項羌寇邊九月丙子招討党項使王仲昇殺
拓拔戎德庚寅郭子儀率李光弼李嗣業王思禮淮西節度使魯
昂興平軍節度使李奐滑濮節度使許叔冀平盧兵馬使董秦鄭
蔡節度使季廣琛以討安慶緒癸巳大食波斯寇廣州十月甲辰
立成王俶爲皇太子大赦賜文武官階爵五品以上子爲父後者
勲兩轉舉忠正孝友堪東宮官者十一月壬申王思禮及安慶緒

戰于相州敗之十二月庚戌戶部尚書李岷都統淮南江東江西節度使丁卯史思明陷魏州

二年正月己巳羣臣上尊號曰乾元大聖光天文武孝感皇帝郭子儀及安慶緒戰于愁思岡敗之丁丑祠九宮貴神戊寅耕籍田二月壬戌中書門下慮囚三月己巳皇后親蠶壬申九節度之師潰于滏水史思明殺安慶緒東京留守崔圓河南尹蘇震汝州刺史賈至奔于襄鄧郭子儀屯于東京丁亥以旱降死罪流於原之流民還者給復三年甲午兵部侍郎呂諲同中書門下平章事乙未苗晉卿王璵罷京兆尹李峴爲吏部尚書中書舍人李揆爲中書侍郎戶部侍郎第五琦同中書門下平章事丙申郭子儀爲東畿山南東河南等道諸節度防禦兵馬元帥四月庚子王思禮及史思明戰于直千嶺敗之王寅詔減常膳服御武德中尚作坊非賜蕃客戎祀所須者皆罷之五月辛巳貶李峴爲蜀州刺史七月辛巳趙王係爲天下兵馬元帥李光弼副之辛卯呂諲罷八月乙

已襄州防禦將康楚元張嘉延反逐其刺史王政九月甲子張嘉延陷荊州丁亥太子少保崔光遠爲荊襄招討山南東道處置兵馬使庚寅史思明陷東京及齊汝鄭滑四州十月乙巳李光弼及史思明戰于河陽敗之壬戌呂諲起復十一月庚午貶第五琦爲忠州刺史十二月乙巳康楚元伏誅史思明寇陝州神策軍將衛伯玉敗之

上元元年三月丙子降死罪流以下原之四月戊申山南東道將張維瑾反殺其節度使史翺丁巳有彗星出于婁胃己未來瑱爲山南東道節度使以討張維瑾閏月辛酉有彗星出于西方申戌徙封係爲越王己卯大赦改元賜文武官爵追封太公望爲武成王復死刑三覆奏是月大饑張維瑾降五月丙午太子太傅苗晉卿爲侍中壬子呂諲罷六月乙丑鳳翔節度使崔光遠及羌渾党項戰于涇隴敗之乙酉又敗之于普潤李光弼及史思明戰于懷州敗之七月丁未聖皇天帝遷于西內十一月甲午揚州長史劉展

反陷潤州丙申陷昇州壬子李恒淮南節度使鄧景山及劉展戰于淮上敗績是歲吐蕃陷鄜州西原蠻寇邊桂州經略使邢濟敗之二年正月甲寅降死罪流以下原之乙卯劉展伏誅二月己未奴刺党項羌寇寶雞焚大散關寇鳳州刺史蕭懷死之鳳翔尹李鼎敗之戊寅李光弼及史思明戰于北邙敗績思明陷河陽癸未貶李揆爲袁州長史河中節度使蕭華爲中書侍郎同中書門下平章事乙酉來瑱及史思明戰于魯山敗之三月甲午史朝義寇陝州神策軍節度使衛伯玉敗之戊戌史朝義弑其父思明李光弼罷副元帥四月己未吏部侍郎裴遵慶爲黃門侍郎同中書門下平章事乙亥青密節度使尚衡及史朝義戰敗之丁丑充鄆節度使能元皓又敗之壬午劍南東川節度兵馬使段子璋反陷綿州遂州刺史嗣虢王巨死之節度使李奐奔于成都五月甲午史朝義將令狐彰以滑州降戊戌平盧軍節度使侯希逸及史朝義戰于幽州敗之庚子李光弼爲河南道副元帥劍南節度使崔光遠

克東川段子璋伏誅七月癸未朔日有食之八月辛巳殿中監李國貞都統朔方鎮西北庭興平陳鄭河中節度使九月壬寅大赦去乾元大聖光天文武孝感號去上元號稱元年以十一月爲歲首月以斗所建辰爲名賜文武官階勲爵版授侍老官先授者敘進之停四京號元年建子月癸巳曹州刺史常休明及史朝義將薛嵩戰敗之巳亥朝聖皇天帝于西內丙午衛伯玉及史朝義戰于永寧敗之巳酉朝獻于太清宮庚戌朝享于太廟及元獻皇后廟建丑月辛亥有事于南郊己未來瑱及史朝義戰于汝州敗之乙亥侯希逸及朝義將李懷仙戰于范陽敗之

寶應元年建寅月甲申追冊靖德太子琮爲皇帝妃竇氏爲皇后乙酉葬王公妃主遇害者丙戌盜發敬陵惠陵甲辰李光弼克許州吐蕃請和戊申史朝義陷營州建卯月辛亥大赦賜文武官階爵五品以上清望及郎官御史薦流人有行業情可矜者停貢鷹鷄狗豹以京兆府爲上都河南府爲東都鳳翔府爲西都江陵

府爲南都太原府爲北都壬子羌渾奴刺寇梁州癸丑河東軍亂殺其節度使鄧景山都知兵馬使辛雲京自稱節度使乙丑河中軍亂殺李國貞及其節度使荔非元禮戊辰淮西節度使王仲昇及史朝義將謝欽讓戰于申州敗績庚午郭子儀知朔方河中北庭路儀澤沁節度行營興平定國軍兵馬副元帥壬申鄜州刺史成公意及党項戰敗之建辰月壬午大赦官吏聽納贓免罪左降官及流人罰鎮効力者還之甲午奴刺寇梁州戊申蕭華罷戶部侍郎元載同中書門下平章事建巳月庚戌史朝義寇澤州刺史李抱玉敗之壬子楚州獻定國寶玉十有三甲寅聖皇天帝崩乙丑皇太子監國大赦改元年爲寶應元年復以正月爲歲首建巳月爲四月丙寅閑廐使李輔國飛龍殿副使程元振遷皇后于別殿殺越王係寃王儻是夜皇帝崩于長生殿年五十二

代宗睿文孝武皇帝諱豫肅宗長子也母曰章敬皇后吳氏玄宗諸孫百餘人代宗最長爲嫡皇孫聰明寬厚喜愠不形於色而好

學強記通易象初名倬封廣平郡王安祿山反玄宗幸蜀肅宗留
討賊代宗常從於兵間肅宗已即位郭子儀等兵討安慶緒未克
肅宗在岐至德二載九月以廣平郡王爲天下兵馬元帥率朔方
安西回紇南蠻大食等兵二十萬以進討百官送于朝堂過關而
下步出木馬門然後復騎以安西北庭行營節度使李嗣業爲前
軍朔方河西隴右節度使郭子儀爲中軍關內行營節度使王思
禮爲後軍屯于香積寺敗賊將安守忠斬首六萬級賊將張通儒
守長安聞守忠敗棄城走遂克京城乃留思禮屯于苑中代宗率大
軍以東安慶緒遣其將嚴莊拒于陝州代宗及子儀嗣業戰陝西
大敗之慶緒奔于河北遂克東都肅宗還京師十二月進封楚王
乾元元年三月徙封成王四月立爲皇太子初太子生之歲豫州
獻嘉禾於是以爲祥乃更名豫肅宗去上元三年號止稱元年月
以斗所建辰爲名元年建巳月肅宗寢疾乃詔皇太子監國而楚
州獻定國寶十有三因曰楚者太子之所封今天降寶於楚宜以

建元乃以元年爲寶應元年肅宗張皇后惡李輔國欲圖之召問太子太子不許乃與越王係謀之肅宗疾革四月丁卯皇后與係將召太子入宮飛龍副使程元振得其謀以告輔國輔國止太子無入率兵入殺係及兗王僦幽皇后于別殿是夕肅宗崩乃迎太子見羣臣於九仙門明日發喪己巳即皇帝位于柩前癸酉始聽政甲戌奉節郡王适爲天下兵馬元帥郭子儀罷副元帥乙亥進封适爲魯王五月壬午李輔國爲司空庚寅追尊母爲皇太后丙申李光弼及史朝義戰于宋州敗之丁酉大赦刺史予一子官賜文武官階爵子爲父後者勲轉免民逋租宿負進封子益昌郡王邈爲鄭王延慶郡王迴韓王追復庶人王氏爲皇后瑛瑤瑤皆復其封號六月辛亥追廢皇后張氏越王係兗王僦皆爲庶人七月乙酉殺山南東道節度使裴戎癸巳劔南西川兵馬使徐知道反八月己未知道伏誅辛未台州人袁晁反乙亥徙封适爲雍王九月戊子鳳州刺史呂日將及党項羌戰于三嗟谷敗之丙申回紇

請助戰壬寅大閱癸卯袁鼂陷信州十月乙卯陷溫明二州詔浙江
水旱百姓重困州縣勿輒科率民疫死不能葬者爲瘞之辛酉雍
王适討史朝義壬戌盜殺李輔國癸酉雍王适克懷州甲戌敗史
朝義于橫水克河陽東都史朝義將張獻誠以汴州降十一月
丁亥朝義將薛嵩以相衛洛邢四州降丁酉朝義將張忠志以趙
定深恒易五州降己亥朔方行營節度使僕固懷恩爲朔方河北
副元帥十二月己酉太府左藏庫火戊辰瘞京城內外暴骨甲戌
李光弼及袁鼂戰于衢州敗之是歲舒州人楊昭反殺其刺史劉
秋子西原蠻叛吐蕃寇秦成渭三州

廣德元年正月癸未京兆尹劉晏爲吏部尚書同中書門下平章
事申申史朝義自殺其將李懷仙以幽州降田承嗣以魏州降壬
寅山陵使山南東道節度使來瑱有罪伏誅三月甲辰山南東道
兵馬使梁崇義自南陽入于襄州丁未李光弼及袁鼂戰敗之辛
酉葬至道大聖大明孝皇帝于泰陵甲子党項羌寇同州郭子儀

敗之于黃堆山庚午葬文明武德大聖大宣孝皇帝于建陵六月
同華節度使李懷讓自殺七月壬寅羣臣上尊號曰寶應元聖文
武孝皇帝壬子大赦改元免民逋負戶三丁免其一庸調給復河
北三年回紇行營所經免今歲租賜内外官階勲爵給功臣鐵券
藏名于太廟圖形于凌煙閣吐蕃陷隴右諸州八月僕固懷恩反
九月壬寅裴遵慶宣慰僕固懷恩于汾州乙丑涇州刺史高暉叛
附于吐蕃十月庚午吐蕃陷邠州辛未寇奉天武功京師戒嚴壬
申雍王适爲關内兵馬元帥郭子儀副之癸酉渭北行營兵馬使
呂日將及吐蕃戰于盤屋敗之乙亥又戰于盤屋敗績丙子如陝
州丁丑次華陰豐王珙有罪伏誅戊寅吐蕃陷京師立廣武郡王
承宏爲皇帝辛巳次陝州癸巳吐蕃潰郭子儀復京師南山五谷
人高玉反十一月壬寅廣州市舶使呂太一反逐其節度使張休
十二月辛未劉晏宣慰上都甲午至自陝州乙未苗晉卿裴遵
慶罷檢校禮部尚書李峴爲黃門侍郎同中書門下平章事丙申

放承宏于華州吐蕃陷松維二州西原蠻陷道州

二年正月丙午詔舉堪御史諫官刺史縣令者乙卯立雍王适爲皇太子癸亥劉晏李峴罷右散騎常侍王縉爲黃門侍郎太常卿杜鴻漸爲兵部侍郎同中書門下平章事郭子儀兼河東副元帥二月辛未僕固懷恩殺朔方軍節度留後渾釋之癸酉朝獻于太清宮甲戌朝享于太廟乙亥有事于南郊己丑大赦賜内外官階爵武德功臣子孫子一人官成都靈武元從三品以上加賜爵一級餘加一階寶應功臣三品以上官一子仍賜爵一級餘加階勳兩轉五品以上爲父後者勳兩轉三月辛丑給復河南府二年甲子盛王琦薨四月甲午禁錮作珠翠五月洛水溢六月丁卯有星隕于汾州七月庚子初稅青苗己酉李光弼薨八月丙寅王縉爲侍中都統河南淮南山南東道節度行營事壬申王縉罷侍中癸巳吐蕃寇邠州邠寧節度使白孝德敗之于宜祿九月己未劍南節度使嚴武及吐蕃戰于當狗城敗之是秋有盛十月丙寅吐蕃

寇邠州丁卯寇奉天京師戒嚴庚午嚴武克吐蕃鹽川城辛未朔方兵馬使郭晞及吐蕃戰于邠西敗之是月突厥寇豐州守將馬望死之十一月乙未吐蕃軍潰京師解嚴河西節度使楊志烈及僕固懷恩戰于靈州敗績癸丑袁晁伏誅免越州今歲田租之半給復溫台明三州一年十二月乙丑高玉伏誅丙寅衆星隕是歲西原蠻陷邵州

永泰元年正月癸巳大赦改元是月歙州人殺其刺史龐濬二月戊寅党項羌寇富平庚辰儀王璦薨三月庚子雨木冰庚戌吐蕃請和平亥大風拔木四月己巳自春不雨至于于是而雨是夏盤屋稽麥生七月辛卯平盧淄青兵馬使李懷玉逐其節度使侯希逸八月庚辰王縉爲河南副元帥僕固懷恩及吐蕃回紇党項羌渾奴刺寇邊九月庚寅命百官觀浮屠象于光順門辛卯太白經天甲辰吐蕃寇醴泉奉天党項羌寇同州渾奴刺寇盤屋京師戒嚴己酉屯于苑郭子儀屯于涇陽丁巳同華節度使周智光及吐

蕃戰于澄城敗之智光入于鄜州殺其刺史張麟遂焚坊州十月沙陀殺楊志烈己未吐蕃至邠州與回紇寇邊辛酉寇奉天癸亥寇同州乙丑寇興平丁卯回紇寇項羌請降癸酉郭子儀及吐蕃戰于靈臺敗之京師解嚴閏月辛卯朔方副將李懷光克靈州辛亥劍南西山兵馬使崔旰反寇成都節度使郭英乂奔于靈池普州刺史韓澄殺之癸丑斂民此其作浮屠者供

大曆元年二月吐蕃遣使來朝壬子杜鴻漸爲山南西道劍南東西川邛南西山等道副元帥三月癸未劍南東川節度使張獻誠及崔旰戰于梓州敗績七月癸酉洛水溢九月辛巳吐蕃陷原州十一月甲子大赦改元給復流民歸業者三年十二月己亥有彗星出于瓠瓜癸卯周智光反殺虢州刺史龐元是冬無雪鄭王邈爲天下兵馬元帥

二年正月丁巳郭子儀討周智光己未同華將李漢惠以同州降甲子周智光伏誅淮西節度使李忠臣入于華州戊寅給復同華

二州二年八月壬寅殺駙馬都尉姜慶初九月甲寅吐蕃寇靈州
乙卯寇邠州郭子儀屯于涇陽京師戒嚴乙丑晝有星流于南方
是秋桂州山獠反十月戊寅朔方軍節度使路嗣恭及吐蕃戰于
靈州敗之京師解嚴十一月辛未雨木冰壬申京師地震

三年二月癸巳商州兵馬使劉洽殺其刺史殷仲卿三月乙巳朔
日有食之五月乙卯追號齊王僖爲皇帝興信公主女張氏爲皇
后癸亥地震六月壬寅幽州兵馬使朱希彩殺其節度使李懷仙
自稱留後閏月庚午王縉兼幽州盧龍軍節度使七月壬申瀘
州刺史楊子琳反陷成都劔南節度留後崔寬敗之克成都子琳
殺夔州別駕張忠茂寅吐蕃遣使來朝八月己酉吐蕃寇靈州丁
卯寇邠州京師戒嚴戊辰邠寧節度使馬璘及吐蕃戰敗之庚
午王縉兼河東節度使九月丁丑濟王環薨壬午吐蕃寇靈州朔
方將白元光敗之壬辰又敗之于靈武戊戌京師解嚴十二月辛
酉涇原兵馬使王童之謀反伏誅

四年正月甲戌殺潁州刺史李岵二月乙卯杜鴻漸罷副元帥丙辰京師地震三月遣御史稅商錢甲戌免京兆今歲稅五月丙戌京師地震六月戊申王縉罷副元帥都統七月癸未降死罪洙以下原之十月丁巳大霧十一月辛未禁畿內弋獵壬申杜鴻漸罷癸酉元載權知門下省事甲戌吐蕃寇靈州朔方軍節度留後常謙光敗之丙子左僕射裴冕同中書門下平章事癸巳裴冕兼河南淮西山南東道副元帥十二月戊戌裴冕薨是歲廣州人馮崇道桂州人朱濟時反客管經略使王翊敗之

五年正月辛卯鳳翔節度使李抱玉爲河西隴右山南西道副元帥三月癸酉內侍監魚朝恩有罪自殺丙戌以昭陵皇堂有光赦京兆關輔四月庚子湖南兵馬使臧玠殺其團練使崔權己未有彗星出于五車五月己卯有彗星出于北方六月己未以彗星滅降死罪洙以下原之錄魏徵王珪李靖李勣房玄齡杜如晦之後是歲湖南將王國良反及西原蠻寇州縣

六年二月壬寅李抱王罷山南西道副元帥三月王翊敗梁崇牽
克容州四月戊寅藍田西原地陷禁大綱竭鑿六破錦及文紗吳
綾爲龍鳳麒麟天馬辟邪者五月戊申殺殿中侍御史陸珽成
都府司錄參軍事李少良大理評事韋頌

七年二月庚午江州江溢五月乙酉大雨雹大風拔木乙未以旱
大赦減膳徹樂是秋幽州盧龍將李懷瑗殺其節度使朱希彩
經略軍副使朱泚自稱留後十月乙亥以淮南旱免租庸三之二十
一月庚辰免巴蓬渠集壁充開八州二歲租庸十二月丙寅雨
土有長星出于參

八年正月甲辰詔京官三品以上及郎官御史歲舉刺史縣令二
人五月辛卯鄭王邈薨壬辰赦京師癸卯降死罪流以下原之八
月己未吐蕃寇靈州郭子儀敗之于七級渠甲子廢華州屯田
給貧民九月壬午循州刺史哥舒晃反殺嶺南節度使呂崇賁戊
子詔京官五品以上兩省供奉官郎官御史言事十月庚申吐蕃

寇涇邠丙寅朔方兵馬使渾瑊及吐蕃戰于宜祿敗績涇原節度使馬璘及吐蕃戰于潘原敗之

九年二月辛未徐州兵亂逐其刺史梁乘四月壬辰大赦十月王申信王瑋薨乙亥涼王璿薨壬辰降京師死罪洊以下原之

十年正月丁酉昭義軍兵馬使裴志清逐其節度使薛平叛附于田承嗣壬寅壽王瑁薨戊申田承嗣反癸丑承嗣陷洛州乙卯劍南西川節度使崔寧及吐蕃戰于西山敗之二月乙丑田承嗣陷衛州刺史薛雄死之辛未封子述爲睦王逾柳王連恩王遘鄜王造忻王暹韶王運嘉王遇端王通循王通恭王達原王逸雅王丙子河陽軍亂逐三城使常休明三月甲午陝州軍亂逐其觀察使李國清四月癸未河東節度使薛兼訓等計田承嗣給復昭義五州二年甲申大雨雹大風拔木五月乙未魏博將霍榮國以礮州降甲寅大雨雹大風拔木震關門六月甲戌成德軍節度使李寶臣及田承嗣戰于冀州敗之七月己未杭州海溢八月己丑田承嗣

寇礪州九月壬寅降京師死罪流以下原之壬子吐蕃寇臨涇癸丑寇隴州丙辰李抱玉敗之于義寧丁巳馬璘又敗之于百里城十月辛酉朔日有食之甲子昭義軍節度使李承昭及田承嗣戰于清水敗之丙寅貴妃獨孤氏薨丁卯追冊為皇后十一月丁酉魏博將吳希光以瀛州降丁未嶺南節度使路嗣恭克廣州哥舒晃伏誅

十一年正月庚寅田承嗣降辛亥崔寧及吐蕃戰敗之五月汴宋都虞候李靈耀反殺濮州刺史孟鑒七月庚寅田承嗣寇滑州永平軍節度使李勉敗績八月甲申淮西節度使李忠臣河陽三城使馬燧及李勉討李靈耀閏月丁酉太白晝見九月乙丑李忠臣馬燧及李靈耀戰于鄭州敗績十月乙酉戰于中牟敗之壬辰忠臣又敗之于西梁固壬寅淮南節度使陳少遊及李靈耀戰于汴州敗之丙午田承嗣以兵援靈耀李忠臣敗之于匡城甲寅靈耀伏誅

十二年三月庚午赦田承嗣辛巳元載有罪伏誅貶王縉爲括州刺史四月壬午太常卿楊綰爲中書侍郎禮部侍郎常袞爲門下侍郎同中書門下平章事癸巳詔諫官獻封事勿限時側門論事者隨狀面奏六品以上官言事投匭者無勒副章丁酉吐蕃寇黎雅二州崔寧敗之是月金州人卓英璘反六月乙巳英璘伏誅給復金州二年丁未以旱降京師死罪流以下原之七月己巳楊綰薨丙子詔尚書御史大夫左右丞侍郎舉任刺史者九月庚午吐蕃寇坊州是秋河溢十一月壬子山南西道節度使張獻恭及吐蕃戰于岷州敗之十二月丁亥崔寧及吐蕃戰于西山敗之是歲恒定趙三州地震冬無雪

十三年正月戊辰回紇寇并州癸酉河東節度留後鮑防及回紇戰于陽曲敗績二月庚辰代州刺史張光晟及回紇戰于羊虎谷敗之四月甲辰吐蕃寇靈州常諫光敗之十月己丑禁京畿持兵器捕獵是歲郴州黃芩山崩

十四年二月癸未魏博節度使田承嗣卒其兄子悅自稱留後三月丁未汴宋將李希烈逐其節度使李忠臣自稱留後五月辛酉不豫詔皇太子監國是夕皇帝崩于紫宸內殿年五十三贊曰天寶之亂大盜遽起天子出奔方是時肅宗以皇太子治兵討賊真得其職矣然以僖宗之時唐之威德在人紀綱未壞孰與天寶之際而僖宗在蜀諸鎮之兵糾合勦力遂破黃巢而復京師由是言之肅宗雖不即尊位亦可以破賊矣蓋自高祖以來三遜于位以授其子而獨睿宗上畏天戒發於誠心若高祖玄宗豈其志哉代宗之時餘孽猶在平亂守成蓋亦中材之主也

本紀第六

本紀第七

唐書七

翰林學士兼龍圖閣學士朝散大夫給事中知制誥充史館脩撰臣歐陽脩奉
敕撰

德宗神武聖文皇帝諱适代宗長子也母曰睿真皇太后沈氏初
沈氏以開元末選入代宗宮安祿山之亂玄宗避賊于蜀諸王妃
妾不及從者皆爲賊所得拘之東都之掖廷代宗克東都得沈氏
留之宮中史思明再陷東都遂失所在肅宗元年建丑月封德宗
奉節郡王代宗即位史朝義據東都乃以德宗爲天下兵馬元帥
進封魯王八月徙封雍王寶應元年十月屯于陝州諸將進擊史
朝義敗之朝義走河北遂克東都十一月史朝義死幽州守將李
懷仙斬其首來獻河北平以功兼尚書令與功臣郭子儀李光弼
等皆賜鐵券圖形凌煙閣廣德二年二月立爲皇太子大曆十四
年五月辛酉代宗崩癸亥即皇帝位于太極殿閏月甲戌貶常袞
爲河南少尹以河南少尹崔祐甫爲門下侍郎同中書門下平章

唐書本紀七
事丙子罷諸州府及新羅渤海貢鷹鵠戊寅罷山南貢枇杷江南
甘橘非供宗廟者辛巳罷邕府歲貢奴婢癸未罷梨園樂工三百
人劍南貢生春酒甲申郭子儀爲尚父兼太尉中書令丙戌罷獻
祥瑞貢器以金銀飾者還之丁亥出宮人放舞象三十有二于荆
山之陽六月己亥大赦賜文武官階爵民爲戶者古爵一級減乘
輿服御士庶田宅車服踰制者有司爲立法度禁百官置邸販鬻
武德至德將相有功者子孫子官庚子進封子宣城郡王誦爲宣
王封子謨爲舒王謚通王諒度王詳肅王謙資王乙巳封弟廼爲
益王迅隋王遂蜀王丙午詔六品以上注河望官日二人待制癸丑
命皇族五等以上居四方者家一人赴山陵己未罷揚州貢鏡幽
州貢麝癸亥舉可刺史京令者七月戊辰朔日有食之庚午弛邕
州金坑禁辛卯罷榷酤八月甲辰道州司馬楊炎爲門下侍郎懷
州刺史喬琳爲御史大夫同中書門下平章事乙巳還吐蕃俘十
月丁酉吐蕃雲南蠻寇黎茂文扶四州屬翔節度使朱泚金吾衛

大將軍曲環敗之于七盤城己酉葬睿文孝武皇帝于元陵戊午
罷九成宮貢立獸炭襄州蔗莢工辛酉以沙苑豢豕三千給貧民
十一月壬午喬琳罷十二月乙卯立宣王誦爲皇太子丙寅晦日
有食之

建中元年正月丁卯改元羣臣上尊號曰聖神文武皇帝己巳朝
獻于太清宮庚午朝享于太廟辛未有事于南郊大赦賜文武
官階勳爵遣黜陟使于天下賜子爲父後者勳兩轉二月丙申初
定兩稅四月乙未四鎮北庭行軍別駕劉文喜反于涇州伏誅己
亥地震六月甲午崔祐甫薨七月丙寅王國良降己丑殺忠州刺
史劉晏八月丁巳遙尊母沈氏爲皇太后九月己卯雷庚寅睦王
述爲奉迎皇太后使是冬無雪黃河滹沱易水溢

二年正月戊辰成德軍節度使李寶臣卒其子惟岳自稱留後幽
州盧龍軍節度使朱滔討之魏博節度使田悅反神策都虞候李
晟河東節度使馬燧昭義軍節度使李抱真河陽節度副使李芑

討之永平軍節度使李勉爲汴滑陳懷鄭汝陝河陽三城宋亳潁
節度都統二月乙巳御史大夫盧杞爲門下侍郎同中書門下平
章事乙卯振武軍亂殺其使彭令芳及監軍劉惠光丁巳發兵屯
關東誓師于望春樓山南東道節度使梁崇義反五月京師雨雹
庚申置待詔官三十人六月熒惑太白闕于東井癸巳淮寧軍節
度使李希烈爲漢南漢北兵馬招討使以討梁崇義辛丑郭子儀
薨七月庚申楊炎罷檢校尚書右僕射侯希逸爲司空王荆永平軍
節度使張鎰爲中書侍郎同中書門下平章事侯希逸薨癸未馬
燧李抱真及田悅戰于臨洛敗之八月劔南西川節度使張延賞
東川節度使王叔邕山南東道節度使賈耽荆南節度使李昌巖
陳少游討梁崇義以李希烈爲諸軍都統辛卯平盧軍節度使李
正己卒其子納自稱留後壬子梁崇義伏誅九月李納陷宋州李
惟岳將張孝忠以易定二州降壬戌賜立功士卒帛粟死事家三
歲十月戊申李納將李洧以徐州降十一月辛酉納寇徐州宣武

軍節度使劉洽敗之于七里灘丁丑馬燧及田悅戰于雙岡敗之
甲申李納將王涉以海州降十二月丁酉馬萬通以密州降馬燧
爲魏博招討使是歲殺崖州司馬楊炎

三年正月丙寅朱滔成德軍節度使張孝忠及李惟岳戰于束
鹿敗之辛未減常膳及太子諸王良物復權酤癸未李納陷海密
二州閏月乙未李惟岳將康日知以趙州降甲辰惟岳伏誅其將
楊榮國以深州降庚戌馬燧及田悅戰于洹水敗之是月悅將李
再春以博州降田昂以沼州降二月戊午李惟岳將楊政義以定
州降甲戌給復易定深趙恒冀六州三年赦吏民爲李惟岳迫脅
者己卯震通化門四月戊午李納將李士真以德棣二州降甲子
借商錢甲戌昭義軍節度副使盧玄卿爲魏博澶相招討使戊寅
張鑑罷壬午殺殿中侍御史鄭詹是月朱滔反陷德棣二州五月
辛卯朔方軍節度使李懷光討田悅六月甲子京師地震恒冀觀
察使王武俊反辛巳李懷光馬燧李芄李抱真及朱滔王武俊田

悅戰于連篋山敗績七月壬辰殿中丞李雲端謀反伏誅癸巳停
借商錢今八月癸丑演州司馬李孟秋峯州刺史皮岸反伏誅九
月丁亥初稅商錢茶漆竹木十月丙辰吏部侍郎關播爲中書侍
郎同中書門下平章事李希烈反丙子肅王詳薨

四年正月丁亥鳳翔節度使張鑑及吐蕃尚結贊盟于清水庚寅
李希烈陷汝州執刺史李元平戊戌東都改行營節度使哥舒曜
討李希烈二月丁卯克汝州三月辛卯李希烈寇鄂州刺史李兼
敗之丁酉荆南節度使張伯儀及李希烈戰于安州敗績四月庚
申李勉爲淮西招討處置使哥舒曜副之張伯儀爲淮西應援招
討使賈耽江南西道節度使嗣曹王皋副之甲子京師地震生毛
丙子哥舒曜及李希烈戰于潁橋敗之五月辛巳京師地震乙酉
潁王璿薨乙未劉洽爲淄青充鄆招討制置使六月庚戌稅屋
閒架筭除陌錢丁卯徙封逾爲丹王遘簡王七月馬燧爲魏博澶
相節度招討使壬辰盧杞關播李忠臣及吐蕃區頰贊盟于京師

八月丁未李希烈寇襄城乙卯希烈將曹季昌以隋州降庚申有
星隕于京師九月丙戌神策軍行營兵馬使劉德信及李希烈戰
于扈澗敗績庚子舒王謨爲荆襄江西沔鄂節度諸軍行營兵馬
都元帥徙封普王十月涇原節度使姚令言反犯京師戊申如奉
天朱泚反庚戌泚殺司農卿段秀實及左驍衛將軍劉海賓鳳翔
後營將李楚琳殺其節度使張鑑自稱留後癸丑李希烈陷襄城
宣武軍兵馬使高翼死之甲寅朱泚殺涇原節度都虞候何明禮
乙卯殺尚書右僕射崔寧丁巳戶部尚書蕭復爲吏部尚書吏部
郎中劉從一爲刑部侍郎京兆府戶曹參軍翰林學士姜公輔爲
諫議大夫同中書門下平章事朱泚犯奉天禁軍敗績于城東辛
酉靈鹽節度留後杜希全郾坊節度使李建徽及朱泚戰于漠谷
敗績癸亥劉德信及泚戰于思子陵敗之甲子行在都虞候渾瑊
及泚戰于城下敗之左龍武軍大將軍呂希倩死之乙丑將軍高
重傑死之是月商州軍亂殺其刺史謝良輔十一月劔南西山兵

馬使張朮逐其節度使張延賞朮伏誅癸巳李懷光及朱泚戰于魯店敗之懷光爲中書令朔方節度使同華陝虢河中晉絳慈隰行營兵馬副元帥十二月朱泚陷華州王戍貶盧杞爲新州司馬庚午李希烈陷汴鄭二州

興元元年正月癸酉大赦改元去聖神文武號復李希烈田悅王武俊李納官爵赴奉天收京城將士有罪減三等子孫減二等在行營者賜勲五轉賜文武官階動當罷罷閒架竹木茶漆稅及除陌錢給復奉天五年城中十年關播罷丙戌吏部侍郎盧翰爲兵部侍郎同中書門下平章事戊子蕭復爲山南東西荆湖淮南江西鄂岳浙江東西福建嶺南宣慰安撫使戊戌劉洽爲汴滑宋亳都統副使二月甲子李懷光爲太尉懷光反丁卯如梁州懷光將孟庭保以兵來追左衛大將軍侯仲莊敗之于驛店三月李懷光奪鄜坊京畿金商節度使李建徽神策軍兵馬使陽惠元兵惠元死之癸酉魏博兵馬使田緒殺其節度使田悅自稱留後甲戌李懷

光毅左廂兵馬使張名振右武鋒兵馬使石演芬丁亥李晟爲京畿渭北鄜坊丹延節度招討使神策行營兵馬使尚可孤爲神策京畿渭南商州節度招討使壬辰次梁州丁酉劉洽權知汴滑宋亳都統兵馬事己亥渾瑊爲朔方鄜寧振武永平奉天行營兵馬副元帥四月李懷光陷坊州甲辰李晟爲京畿渭北商華兵馬副元帥甲寅姜公輔罷涇原兵馬使田希鑒殺其節度使馮河清自稱留後乙丑渾瑊及朱泚戰于武亭川敗之丁卯義王玢薨是月坊州刺史竇覲克坊州五月癸酉涇王侑薨丙子李抱真王武俊及朱滔戰于經城敗之壬辰尚可孤及朱泚戰于藍田之西敗之乙未李晟又敗之于苑北戊戌又敗之于白華復京師六月癸卯姚令言伏誅甲辰朱泚伏誅己酉李晟爲司徒中書令癸丑以梁州爲興元府給復一年耆老加版授甲寅渾瑊爲侍中己巳給復洋州一年加給興元一年免鳳州今歲稅父老加版授七月丙子次鳳翔免今歲秋稅八十以上版授刺史餘授上佐丁丑葬宗室遇害

者壬午至自興元丁亥李懷光殺宣慰使孔巢父辛卯大赦賜百
官將士階勲爵收京城者外八資給復京兆府一年是月嗣曹王
皐及李希烈戰于應山敗之八月癸卯李晟爲鳳翔隴右諸軍涇
原四鎮北庭行營兵馬副元帥馬燧爲晉慈隰諸軍行營兵馬副
元帥渾瑊爲河中同絳陝虢諸軍行營兵馬副元帥丙午渾瑊兼
朔方行營兵馬副元帥己酉延王玢隋王迅薨十月辛丑李勉檢
校司徒同中書門下平章事閏月戊子李希烈將李澄以滑州降
十一月癸卯劉洽邠隴行營節度使曲環及李希烈戰于陳州敗
之戊午克汴州乙丑蕭復罷十二月乙酉渾瑊及李懷光戰于乾
坑敗績是歲陳王珪薨

貞元元年正月丁酉大赦改元罷權稅三月李懷光殺步軍兵馬
使田山浩都虞候呂鳴岳丁未李希烈陷鄧州殺唐鄧隋招討使
黃金岳是春旱四月乙丑徙封詎爲舒王壬午渾瑊及李懷光戰
于長春宮敗之丙戌馬燧渾瑊爲河中招撫使六月己丑幽州盧

龍軍節度使朱滔卒涿州刺史劉怦自稱留後辛卯劔南西川節度使張延賞為中書侍郎同中書門下平章事戊子馬燧及李懷光戰于陶城敗之七月灞澠竭庚子大風拔木八月襲封配饗功臣子孫甲子以旱避正殿減膳甲戌李懷光伏誅己卯給復河中同絳二州一年馬燧為侍中張延賞罷丙戌李希烈殺宣慰使顏真卿九月辛亥劉從一罷庚申幽州盧龍軍節度使劉怦卒其子濟自稱留後是秋雨木冰十一月癸卯有事于南郊大赦賜奉天興元扈從百官收京將士階勳爵

二年正月丙申詔減御膳之半調貧乏者授以官壬寅盧朝罷吏部侍郎劉滋為左散騎常侍給事中崔造中書舍人齊映同中書門下平章事二月癸亥山南東道節度使樊澤及李希烈戰于泌河敗之四月丙寅希烈伏誅甲戌雨土甲申給復淮西二年五月李希烈將李惠登以隋州降己酉地震六月癸未滄州刺史程日華卒其子懷直自稱觀察留後是月淮西兵馬使吳少誠殺其節

唐書卷一百一十五
度使陳仙奇自稱留後七月李希列將薛翼以唐州降侯召以光
州降八月丙子大雨雹丙戌吐蕃寇邠寧涇隴四州九月乙巳寇好
時李晟敗之于汧陽十月癸酉邠寧節度使韓游瓌又敗之于平
川十一月甲午立淑妃王氏爲皇后丁酉皇后崩辛丑吐蕃陷鹽
州十二月丁巳陷夏州馬燧爲綏銀麟勝招討使庚申崔造罷
甲戌以吐蕃寇邊避正殿

三年正月壬寅尚書左僕射張延賞同中書門下平章事壬子劉
滋罷貶齊映爲蔓州刺史兵部侍郎柳渾同中書門下平章事二
月己卯華州潼關節度使駱元光克鹽夏二州甲申葬昭德皇后
于靖陵三月丁未李晟爲太尉辛亥馬燧罷副元帥五月揚州江
溢吳少誠殺申州刺史張伯元殿中侍御史鄭常閏月辛未渾瑊
及吐蕃盟于平涼吐蕃執會盟副使兵部尚書崔漢衡殺判官殿
中侍御史韓昇戊寅太白晝見六日吐蕃寇鹽夏二州丙戌馬燧
爲司徒前陝虢觀察使李泌爲中書侍郎同中書門下平章事七

月甲子朔方節度使杜希全爲朔方靈鹽豐夏綬銀節度都統壬申張延賞薨八月辛巳朔日有食之己丑柳渾罷戊申吐蕃寇青石嶺隴州刺史蘇清洸敗之庚戌禁大馬出蒲潼武關九月丁巳吐蕃寇汧陽丙寅陷華亭及連雲堡十月甲申寇豐義韓游瓌敗之乙酉寇長武城城使韓全義敗之壬辰射生將韓欽緒謀反伏誅十一月己卯京師東都河中地震十二月庚辰獵于新店

四年正月庚戌朔京師地震大赦刺史予一子官增戶墾田者加階縣令減選九品以上官言事壬申劉玄佐爲四鎮北庭行營涇原節度副元帥是月金房二州地震江溢山裂雨水冰于陳留四月河南淮海地生毛己亥福建軍亂逐其觀察使吳詵大將郝誠溢自稱留後五月吐蕃寇涇邠寧慶鄜五州六月己亥封子諤爲邕王七月庚戌渾瑊爲邠寧慶副元帥癸丑寧州軍亂邠寧都虞候楊朝晟敗之己未奚室韋寇振武是月河水黑八月灞水溢九月庚申吐蕃寇寧州邠寧節度使張獻甫敗之冬築夾城是歲京師

地震二十

五年正月甲辰朔日有食之二月庚子大理卿董誥爲門下侍郎御史大夫竇參爲中書侍郎同中書門下平章事三月甲辰李泌薨夏吐蕃寇長武城韓全義敗之于佛堂原九月丙午劔南西川節度使韋皋敗吐蕃于臺登北谷克嶺州十月嶺南節度使李復克瓊州

六年春旱閏四月乙卯詔常參官畿縣令言事免京兆府夏稅八月辛丑殺皇太子妃蕭氏十一月戊辰朝獻于太清宮己巳朝享于太廟庚午有事于南郊賜文武官階爵降囚罪徒以下原之葬戰亡暴骨者是歲吐蕃陷北庭都護府節度使楊襲古奔于西州七年正月己巳襄王僨薨四月安南首領杜英翰反伏誅五月甲申端王遇薨九月回鶻殺楊襲古十二月戊戌睦王述薨是冬無雪

八年二月庚子雨土三月甲申宣武軍節度使劉玄佐卒其子士

寧自稱留後四月吐蕃寇靈州丁亥殺左諫議大夫知制誥吳通
玄乙未貶實參爲郴州別駕尚書左丞趙憬兵部侍郎陸贄爲中
書侍郎同中書門下平章事五月己未大風發太廟屋瓦癸酉平
盧軍節度使李納卒其子師古自稱留後六月淮水溢吐蕃寇連
雲堡大將王進用死之九月丁巳韋臯及吐蕃戰于維州敗之十一
月壬子朔日有食之庚午山南西道節度使嚴震及吐蕃戰于黑
水堡敗之是月幽州盧龍軍節度使劉濟及其弟瀛州刺史擁
戰于瀛州擁敗奔于京師十二月甲辰獵于城東

九年正月癸卯復稅茶四月辛酉關輔河中地震五月甲辰義成
軍節度使賈耽爲尚書右僕射尚書右丞盧邁同中書門下平章
事丙午董晉罷八月庚戌李晟薨十一月癸未朝獻于太清宮甲
申朝享于太廟乙酉有事于南郊大赦十二月丙辰宣武軍將李
萬榮逐其節度使劉士寧自稱留後

十年正月壬辰南詔蠻敗吐蕃于神川來獻捷四月癸卯朔赦京

城戊申地震癸丑又震是月太白晝見六月丙寅韋臯敗吐蕃克
峨和城自春不雨至于是月辛未雨大風拔木七月西原蠻叛八
月陷欽橫潯貴四州十月昭義軍節度留後王虔休及攝洛州刺
史元誼戰于鷄澤敗之十二月丙辰獵于城南壬戌貶陸贄爲太
子賓客

十一年四月丙寅奚寇平州劉濟敗之于青都山五月庚午中書
門下慮囚八月辛亥馬燧薨九月橫海軍兵馬使程懷信逐其兄
節度使懷直自稱留後十月卽蜀二州江溢十二月戊辰獵于苑中
十二年二月己卯吐蕃寇雋州刺史曹高仕敗之三月丙辰詔王
暹薨四月庚午魏博節度使田緒卒其子季安自稱留後六月己
丑宣武軍節度使李萬榮卒其子廼自稱兵馬使伏誅七月戊
戌韓王迥薨八月己未朔日有食之丙戌趙憬薨九月吐蕃寇慶
州十月甲戌右諫議大夫崔損給事中趙宗儒同中書門下平

章事

十三年正月壬寅吐蕃請和四月辛酉以旱慮囚壬戌雩于興慶宮五月壬寅吐蕃寇雋州曹高仕敗之庚戌義寧軍亂殺其將常楚客七月乙未京師地震九月己丑盧邁罷

十四年三月丙申鳳翔監軍使西門去奢殺其將夏侯衍五月己酉始雷閏月辛亥有星隕于西北辛酉長武城軍亂逐其使韓全義六月丙申歸化堡軍亂逐其將張國誠涇原節度使劉昌敗之七月壬申趙宗儒罷工部侍郎鄭餘慶爲中書侍郎同中書門下平章事九月丁卯杞王倓薨十二月壬寅明州將栗鍠殺其刺史盧雲以反是冬無雪京師饑

十五年正月甲寅雅王逸薨壬戌郴州藍山崩二月乙酉宣武軍亂殺節度行軍司馬陸長源宋州刺史劉逸淮自稱留後三月甲寅彰義軍節度使吳少誠反陷唐州守將張嘉瑨死之四月乙未栗鍠伏誅九月乙巳陳許節度留後上官沔及吳少誠戰于臨潁敗績丙午少誠寇許州庚戌宣武軍節度使劉全諒卒都知兵馬

使韓弘自稱留後丙辰宣武河陽鄭滑東都汝成德幽州淄青魏博易定澤潞河東淮南徐泗山南東西鄂岳軍討吳少誠十月己丑邕王諒薨十一月丁未山南東道節度使于頔及吳少誠戰于吳房敗之陳許節度使上官沈又敗之于柴籬辛亥安黃節度使伊慎又敗之于鍾山十二月庚午壽州刺史王宗又敗之于秋柵辛未渾瑊薨乙未諸道兵潰于小潒河

十六年正月乙巳易定兵及吳少誠戰敗績二月乙酉鹽夏綏銀節度使韓全義爲蔡州行營招討處置使上官沈副之四月丁亥黔中宴設將傅近逐其觀察使吳士宗五月庚戌韓全義及吳少誠戰于廣利城敗績壬子徐泗濠節度使張建封卒其子愔自稱知軍事七月丁巳伊慎及吳少誠戰于申州敗之己未韋臯克吐蕃末恭城丙寅韓全義及吳少誠戰于五樓敗績八月劉濟及其弟涿州刺史源戰于涿州源敗執之己丑殺遂州別駕崔位韋臯克吐蕃顯城九月庚戌敗鄭餘慶爲柝州司馬庚申太常卿齊抗

爲中書侍郎同中書門下平章事十月辛未殺通州別駕崔河圖
是歲京師饑

十七年二月丁酉大雨雹己亥霜乙巳韋臯及吐蕃戰于鹿危山
敗之戊申大雨雹震電庚戌大雪雨雹五月壬戌朝日有食之六
月丙申寧州軍亂殺其刺史劉南金己亥浙西觀察使李錡殺上
封事人崔善員丁巳成德軍節度使王武俊卒其子士真自稱留
後七月隕霜殺菽戊寅吐蕃寇鹽州己丑陷麟州刺史郭鋒死之
九月乙亥韋臯敗吐蕃于雅州克木波城是歲嘉王暉薨

十八年七月乙亥罷正衙奏事十二月環王陷驩愛二州

十九年二月己亥安南將王季元逐其經略使裴泰兵馬使趙均
敗之三月壬子淮南節度使杜佑檢校司空同中書門下平章事
七月己未齊抗罷自正月不雨至于是月甲戌雨閏十月庚戌鹽
州將李庭俊反伏誅丁巳崔損薨十二月庚申太常卿高郢爲中
書侍郎吏部侍郎鄭珣瑜爲門下侍郎同中書門下平章事

二十年二月庚戌大雨雹七月癸酉大雨雹冬雨水冰

二十一年正月癸巳皇帝崩于會寧殿年六十四

順宗至德弘道大聖大安孝皇帝諱誦德宗長子也母曰昭德皇后王氏始封宣城郡王大曆十四年六月進封宣王十二月乙卯立爲皇太子爲人寬仁喜學藝善隸書禮重師傅見輒先拜從德宗幸奉天常執弓矢居左右郅國公主以蠱事得罪太子妃其女也德宗疑之幾廢者屢矣賴李泌保護乃免後侍宴魚藻宮張水嬉綵艦宮人爲擢歌衆樂間發德宗驩甚顧太子曰今日何如太子誦詩好樂無荒以爲對及裴延齡隸渠牟用事世皆畏其爲相太子母候顏色陳其不可故二人者卒不得用貞元二十年太子病風且瘖二十一年正月不能朝是時德宗不豫諸王皆侍左右惟太子卧病不能見德宗悲傷涕泣疾有加癸巳德宗崩丙申即皇帝位于太極殿二月癸卯朝羣臣于紫宸門辛亥吏部侍郎韋執誼爲尚書左丞同中書門下平章事甲子大赦罷宮市民百歲

版授下州刺史婦人郡君九十以上上佐婦人縣君乙丑罷鹽鐵使
月進三月庚午放後宮三百人癸酉放後宮及教坊女妓六百人
癸巳立廣陵郡王純爲皇太子四月壬寅封弟諤爲欽王誠珍王
進封子建康郡王經鄴王洋川郡王緯均王臨淮郡王縱澈王弘
農郡王紆莒王漢東郡王綱密王晉陵郡王總郇王高平郡王約
邵王雲安郡王結宋王宣城郡王緇集王德陽郡王絳冀王河東
郡王綺和王封子絢爲衡王纁會王綰福王紘撫王緄岳王紳表
王綸桂王緝翼王戊申以冊皇太子降死罪以下賜文武官子爲
父後者勲兩轉七月辛卯橫海軍節度使程懷信卒其子執恭
自稱留後乙未皇太子權句當軍國政事太常卿杜黃裳爲門下
侍郎左金吾衛大將軍表滋爲中書侍郎同中書門下平章事鄭
珣瑜高郢罷

永貞元年八月庚子立皇太子爲皇帝自稱曰太上皇辛丑改元
降死罪以下立良娣王氏爲太上皇后元和元年正月皇帝率羣

臣上尊號曰應乾聖壽太上皇是月崩于咸寧殿年四十六諡曰至德大聖大安孝皇帝大中三年增諡至德弘道大聖大安孝皇帝

憲宗昭文章武大聖至神孝皇帝諱純順宗長子也母白莊憲皇太后王氏貞元四年六月己亥封廣陵郡王二十一年三月立爲皇太子永貞元年八月順宗詔立爲皇帝乙巳即皇帝位于太極殿丁未始聽政庚戌罷獻祥瑞癸丑劍南西川節度使韋皋卒行軍司馬劉闢自稱留後戊午天有聲于西北己未素滋爲劍南西川山南西道安撫大使癸亥尚書左丞鄭餘慶同中書門下平章事九月己巳罷教坊樂工正貢官十月丁酉爲曾太皇太后舉哀賈耽薨戊戌舒王誼薨素滋罷己酉葬神武聖文皇帝于崇陵十一月己巳祔睿皇帝后于元陵寢宮壬申貶韋執誼爲崖州司馬夏綏銀節度留後楊惠琳反十二月壬戌中書舍人鄭絪爲中書侍郎同中書門下平章事

元和元年正月丁卯大赦改元賜文武官階勲爵民高年者米帛
羊酒癸未長武城使高崇文爲左神策行營節度使率左右神策
京西行營兵馬使李元奕山南西道節度使嚴礪劍南東川節度
使李康以討劉闢甲申太上皇崩劉闢陷梓州執李康三月丙子
高崇文克梓州辛巳楊惠琳伏誅四月丁未杜佑爲司徒壬戌邵
王約薨初令尚書省六品諸司四品以上職事官太子師傅賓客
詹事王府傳曰二人待制五月辛卯尊母爲皇太后六月癸巳降
死罪以下賜百姓有父母祖父母八十以上者粟二斛物二段九十
以上粟三斛物三段丙申大風拔木丁酉高崇文及劉闢戰于鹿
頭柵敗之癸卯嚴礪又敗之于石碑谷閏月壬戌平盧軍節度使
李師古卒其弟師道自稱留後七月壬寅葬并至德大聖大安孝皇
帝于豐陵癸丑高崇文及劉闢戰于玄武敗之八月丁卯進封子
平原郡王寧爲鄧王同安郡王寬禮王延安郡王宥遂王彭城郡
王察深王高密郡王寰洋王文安郡王寮絳王封子審爲建王九

月丙午嚴礪及劉闢戰于神泉敗之辛亥高崇文克成都十月甲子減劍南東西川山南西道今歲賦釋脅從將吏葬陣亡者稟其家五歲戊子劉闢伏誅十一月庚戌鄭餘慶罷是歲召王德用二年正月己丑朝獻于太清宮庚寅朝享于太廟辛卯有事于南郊大赦賜文武官勲爵文宣公三王後三恪公主諸王一子官高年米帛羊酒加版授乙巳杜黃裳罷己酉御史中丞武元衡爲門下侍郎中書舍人李吉甫爲中書侍郎同中書門下平章事二月己巳罷兩省官次對癸酉邕管經略使路恕敗黃洞蠻執其首領黃承慶九月乙酉密王綢薨十月鎮海軍節度使李錡反殺留後王澹乙丑淮南節度使王鐸爲諸道行營兵馬招討使以討之丁卯武元衡罷癸酉鎮海軍兵馬使張子良執李錡己卯免潤州今歲稅十一月甲申李錡伏誅十二月丙寅劍南西川節度使高崇文爲邠寧節度京西諸軍都統

三年正月癸巳羣臣上尊號曰睿聖文武皇帝大赦罷諸道受代

進奉錢三月癸巳郇王總薨四月壬申大風壞含元殿西闕檻六月西原蠻首領黃少卿降七月辛巳朔日有食之九月庚寅山南東道節度使于頔為司空同中書門下平章事丙申戶部侍郎裴均為中書侍郎同中書門下平章事戊戌李吉甫罷

四年正月壬午免山南東道淮南江西浙東湖南荆南今歲稅戊子簡王邁薨二月丁卯鄭綯罷給事中李藩為門下侍郎同中書門下平章事三月乙酉成德軍節度使王士真卒其子承宗自稱留後閏月己酉以旱降京師死罪非殺人者禁刺史境內樵率諸道旨條外進獻嶺南黔中福建掠良民為奴婢者省飛龍殿馬己未雨丁卯立鄧王寧為皇太子七月癸亥吐蕃請和八月丙申環王寇安南都護張舟敗之十月辛巳成德軍節度使王承宗反執保信軍節度使薛昌朝癸未左神策軍護軍中尉吐突承璀為左右神策河陽浙西宣歙鎮州行營兵馬招討處置使以討之戊子承璀為鎮州招討宣慰使癸巳降死罪以下賜文武官子為父後

唐書卷一百一十七
十三
者勲兩轉十一月己巳彰義軍節度使吳少誠卒其弟少陽自稱
留後

五年正月己巳左神策軍大將軍鄺定進及王承宗戰死之三月甲
子大風拔木四月丁亥河東節度使范希朝義武軍節度使張茂
昭及王承宗戰于木刀溝敗之七月丁未赦王承宗乙卯幽州盧龍
軍節度使劉濟卒其子總自稱留後九月丙寅太常卿權德輿為
禮部尚書同中書門下平章事十月張茂昭以易定二州歸于有
司辛巳義武軍都虞候楊伯玉反伏誅是月義武軍兵馬使張佐
元反伏誅十一月甲辰會王縵薨庚申裴垣罷

六年正月庚申淮南節度使李吉甫為中書侍郎同中書門下平
章事二月壬申李藩罷己丑忻王造薨三月戊戌有星墜于鄆州
十二月己丑戶部侍郎李絳為中書侍郎同中書門下平章事閏
月辛卯辰潞州首領張伯靖反寇播費二州辛亥皇太子薨

七年正月癸酉振武河湓毀東受降城四月癸巳詔民田晦樹桑

二六月癸巳杜佑罷七月乙亥立遂王宥爲皇太子八月戊戌魏博節度使田季安卒其子懷諫自稱知軍府事九月京師地震十月乙未魏博軍以田季安之將田興知軍事庚戌降死罪以下賜文武官子爲父後者勲兩轉是月魏博節度使田興以六州歸于有司十一月辛酉赦魏博貝衛檀相六州給復一年賜高年孤獨廢疾粟帛賞軍士

八年正月辛未權德輿罷二月丁酉貶于頔爲恩王傅三月甲子劔南西川節度使武元衡爲門下侍郎同中書門下平章事四月己亥黔中經略使崔能討張伯靖五月癸亥荆南節度使嚴綬討伯靖丁丑大隗山崩六月辛卯渭水溢辛丑出宮人七月己巳劔南東川節度使潘孟陽討張伯靖八月辛巳湖南觀察使柳公綽討伯靖丁未伯靖降十二月庚寅振武將楊遵憲反逐其節度使李進賢

九年二月癸卯李絳罷三月丙辰雋州地震丁卯隕霜殺桑五月

乙丑桂王綸薨癸酉以旱免京畿夏稅六月壬寅河中節度使張弘靖爲刑部尚書同中書門下平章事閏八月丙辰彰義軍節度使吳少陽卒其子元濟自稱知軍事九月丁亥山南東道節度使嚴綬忠武軍都知兵馬使李光顏壽州團練使李文通河陽節度使烏重胤討之十月太白晝見丙午李吉甫薨甲子嚴綬爲申光蔡招撫使十一月戊子罷京兆府臘獻狐兔十二月詔刑部大理官朔望入對戊辰尚書右丞韋貫之同中書門下平章事

十年正月乙酉宣武軍節度使韓弘爲司徒二月甲辰嚴綬及吳元濟戰于磁丘敗績自冬不雨至于是月丙午雪壬戌河東戍將劉輔殺豐州刺史燕重珣伏誅三月庚子忠武軍節度使李光顏及吳元濟戰于臨潁敗之四月甲辰又敗之于南頓五月丙申又敗之于時曲六月癸卯盜殺武元衡戊申京師大索乙丑御史中丞裴度爲中書侍郎同中書門下平章事七月甲戌王承宗有罪絕其朝貢八月己亥朔日有食之丁未李師道將訾嘉珍反于東

都留守呂元膺敗之乙丑李光顏及吳元濟戰于時曲敗績九月
癸酉韓弘爲淮西行營兵馬都統十月地震十一月壬申李光顏
烏重胤及吳元濟戰于小澗河敗之丁丑李文通又敗之于固始
戊寅盜焚獻陵寢宮十二月甲辰武寧軍都押衙王智興及李師
道戰于平陰敗之是歲丹王迺薨

十一年正月己巳張弘靖罷乙亥幽州盧龍軍節度使劉總及王
承宗戰于武彊敗之癸未免鄰賊州二歲稅甲申盜斷建陵門戟
二月庚子王承宗焚蔚州乙巳中書舍人李逢吉爲門下侍郎同
中書門下平章事乙丑地震三月庚午皇太后崩四月庚子李光
顏烏重胤及吳元濟戰于凌雲柵敗之乙卯劉總及王承宗戰于
深州敗之己未免京畿二歲逋稅五月丁卯宥州軍亂逐其刺史
駱怡夏綏銀節度使田緡敗之丁亥雲南蠻寇安南六月密州海
溢甲辰唐鄧節度使高霞寓及吳元濟戰于鐵城敗績七月壬午
韓弘及元濟戰于郾城敗之丙戌免淮西鄰賊州夏稅八月甲午

渭水溢壬寅韋貫之罷戊申西原蠻陷賓蠻二州己未昭義軍節度使郗士美及王承宗戰于栢鄉敗之庚申葬莊憲皇太后于豐陵十一月乙丑邕管經略使韋悅克賓蠻二州甲戌元陵火十二月丁未翰林學士工部侍郎王涯爲中書侍郎同中書門下平章事己未西原蠻陷巖州是冬桃李華

十二年正月丁丑地震戊子有彗星出于畢四月辛卯唐鄧隋節度使李愬及吳元濟戰于嶺岬山敗之乙未李光顏又敗之于郾城五月辛酉李愬又敗之于張柴七月丙辰裴度爲淮西宣慰處置使戶部侍郎崔羣爲中書侍郎同中書門下平章事八月癸亥烏重胤及吳元濟戰于賈店敗績九月丁未李逢吉罷甲寅李愬及吳元濟戰于吳房敗之十月癸酉克蔡州甲戌淮南節度使李鄘爲門下侍郎同中書門下平章事甲申給復淮西二年免旁州來歲夏稅苑戰士稟其家五年十一月丙戌吳元濟伏誅甲午恩王連薨是歲容管經略使陽旻克欽橫潯貴四州

十三年正月乙酉大赦免元和二年以前逋負賜高年米帛羊酒
三月戊戌御史大夫李夷簡爲門下侍郎同中書門下平章事李
鄘罷已酉橫海軍節度使程權以滄景二州歸于有司權朝于京
師四月甲寅王承宗獻德棣二州庚辰赦承宗六月癸丑朔日有
食之癸亥給復德棣滄景四州一年辛未淮水溢七月乙酉宣武
魏博義成橫海軍討李師道辛丑李夷簡罷八月壬子王涯罷九
月甲辰戶部侍郎皇甫鏘諸道鹽鐵轉運使程異爲工部侍郎
同中書門下平章事十月壬戌吐蕃寇宥州靈武節度使杜叔良
敗之于定遠城十一月丁亥命山人柳泌爲台州刺史以求藥十
二月庚戌迎佛骨于鳳翔

十四年正月丙午田弘正及李師道戰于陽穀敗之二月戊午師
道伏誅四月辛未程異薨丙子裴度罷七月戊寅韓弘以汴宋毫
潁四州歸于有司弘朝于京師己丑羣臣上尊號曰元和聖文神
武法天應道皇帝大赦賜文武官階勳爵遣黜陟使于天下辛卯

沂海將王弁殺其觀察使王遂自稱留後丁酉河陽節度使令狐楚爲中書侍郎同中書門下平章事八月己酉韓弘爲中書令九月戊寅王弁伏誅十月壬戌安南將楊清殺其都護李象古以反癸酉吐蕃寇鹽州十二月辛卯朔方將史訪奉及吐蕃戰于瓠蘆河敗之十二月乙卯崔羣罷

十五年正月宦者陳弘志等反庚子皇帝崩年四十三諡曰聖神章武孝皇帝大中三年加諡昭文章武大聖至神孝皇帝
贊曰德宗猜忌刻薄以彊明自任恥見屈於正論而忘受欺於姦諛故其疑蕭復之輕已謂姜公輔爲買直而不能容用盧杞趙贊則至於敗亂而終不悔及奉天之難深自懲艾遂行姑息之政由是朝廷益弱而方鎮愈彊至於唐亡其患以此憲宗剛明果斷自初即位慨然發憤志平僭叛能用忠謀不惑群議卒收成功自吳元濟誅彊藩悍將皆欲悔過而効順當此之時唐之威令幾於復振則其爲優劣不待較而可知也及其晚節信用非人不終其業

而身罹不測之禍則尤甚於德宗嗚呼小人之能敗國也不必愚
君暗主雖聰明聖智苟有惑焉未有不爲患者也昔韓愈言順
宗在東宮二十年天下陰受其賜然享國日淺不幸疾病莫克有
爲亦可以悲夫

本紀第七

本紀第八

唐書

翰林學士兼龍圖閣學士朝散李給事中知制誥充史館脩撰臣陽脩奉
敕撰

穆宗睿聖文惠孝皇帝諱恒憲宗第三子也母曰懿安皇太后郭氏始封建安郡王進封遂王遙領彰義軍節度使元和七年惠昭太子薨左神策軍中尉吐突承璀欲立澧王暉而暉母賤不當立乃立遂王為皇太子十五年正月庚子憲宗崩陳弘志殺吐突承璀及澧王辛丑遺詔皇太子即皇帝位于柩前司空兼中書令韓弘攝冢宰閏月丙午皇太子即皇帝位于太極殿丁未貶皇甫鏞為崖州司戶參軍戊申始聽政辛亥御史中丞蕭俛中書舍人翰林學士段文昌為中書侍郎同中書門下平章事乙卯尊母為皇太后戊辰京師地震二月丁丑大赦賜文武官階爵高年粟帛二王後三恪文宣公嗣王公主縣主武德配鄉食及第一等功臣家子一子官放沒掖庭者幸丹鳳門觀俳優丁亥幸左神策軍觀角觝

倡戲乙未吐蕃寇靈州丙申丹王逾薨三月乙巳杜叔良及吐蕃
戰敗之戊辰大風雨雹辛未楊清伏誅五月庚申葬聖神章武孝
皇帝于景陵六月丁丑韓弘罷七月丁卯令狐楚罷八月乙酉容
管經略留後嚴公素及黃洞蠻戰于神步敗之戊戌御史中丞崔
植爲中書侍郎同中書門下平章事九月辛丑觀競渡角觝于魚
藻宮用樂十月庚辰王承宗卒辛巳成德軍觀察支使王承元以
鎮趙深冀四州歸于有司癸未吐蕃寇涇州右神策軍中尉梁守
謙爲左右神策京西京北行營都監以禦之丙戌吐蕃遁十一月
癸卯赦鎮趙深冀四州死罪以下賜成德軍將士錢十二月庚辰
獵于城南壬午擊鞠于右神策軍遂獵于城西甲申獵于苑北
長慶元年正月己亥朝獻于太清宮庚子朝享于太廟辛丑有事
于南郊大赦改元賜文武官階勳爵己未有星孛于翼壬戌蕭俛
罷丁卯有星孛于太微二月乙亥觀樂于麟德殿丙子觀神策諸
軍雜伎己卯劉總以盧龍軍八州歸于有司壬午段文昌罷翰林

學士戶部侍郎杜元穎同中書門下平章事辛卯擊鞠于麟德殿
三月庚戌太白晝見丁巳赦幽涿檀順瀛莫管平八州死罪以下給
復一年賜盧龍軍士錢戊午封弟憬爲卿王悅瓊王恂沔王懌葵
王愔茂王怡光王協淄王僖衢王忱渲王子湛爲鄂王涵江王湊
漳王溶安王瀍穎王是月徙封湛爲景王五月丙辰建王審薨六
月有彗星出于昴辛未吐蕃寇塞烽鹽州刺史李文悅敗之七
月甲辰幽州盧龍軍都知兵馬使朱克融囚其節度使張弘靖以
反壬子羣臣上尊號曰文武孝德皇帝大赦賜文武官階勳爵王
忒成德軍大將王廷湊殺其節度使田弘正以反八月壬申朱克
融陷莫州癸酉王廷湊陷冀州刺史王進岌死之丙子瀛州軍亂
執其觀察使盧士玫叛附于朱克融王廷湊寇深州丁丑魏博橫
海昭義河東義武兵討王庭湊己丑裴度爲幽鎮招撫使九月乙
巳相州軍亂殺其刺史邢滌十月丙寅諸道鹽鐵轉運使刑部尚
書王播爲中書侍郎同中書門下平章事裴度爲鎮州西面行營

都招討使左領軍衛大將軍杜叔良爲深州諸道行營節度使戊寅王庭湊陷貝州己卯易州刺史柳公濟及朱克融戰于白石敗之庚辰橫海軍節度使烏重胤及王庭湊戰于饒陽敗之辛卯靈武節度使李進誠及吐蕃戰于大石山敗之十一月甲午裴度及王庭湊戰于會星敗之丙申朱克融寇定州義武軍節度使陳楚敗之十二月庚午杜叔良及王庭湊戰于博野敗績丁丑陳楚及朱克融戰于望都敗之乙酉赦朱克融己丑陳楚及克融戰于清源敗之

二年正月庚子魏博軍潰于南宮癸卯魏博節度使田布自殺兵馬使史憲誠自稱留後海州海冰二月甲子赦王庭湊辛巳崔植罷工部侍郎元稹同中書門下平章事戊子昭義軍節度使劉悟囚其監軍使劉承偕三月乙巳武寧軍節度副使王智興逐其節度使崔羣戊午守司徒淮南節度使裴度同中書門下平章事王播罷四月辛酉朔日有食之王忾成德軍節度使牛元翼奔于

京師王庭湊陷深州五月壬寅邕州刺史李元宗叛奔于黃洞蠻
六月癸亥宣武軍宿直將李臣則逐其節度使李愿衙門都將李
宥反甲子裴度元稹罷兵部尚書李逢吉爲門下侍郎同中書門
下平章事乙丑大風落太廟鴟尾癸酉吐蕃寇靈州鹽州刺史趙
旰敗之七月丙申宋王結薨戊申李宥陷宋州丙辰充鄆節度使
曹華及李宥戰于宋州敗之丁巳忠武軍節度使李光顏又敗之
于尉氏八月壬申宣武軍節度使韓充又敗之于郭橋丙子李宥
伏誅癸未詔瘞汴宋鄭三州戰亡者梟其家三歲九月戊子鎮海
軍將王國清謀反伏誅丙申德州軍亂殺其刺史王稷十月己卯
獵于咸陽十一月庚午皇太后幸華清宮癸酉迎皇太后遂獵于
驪山丙子集王緡薨十二月丁亥不豫放五坊鷹隼及供獵狐兔
癸巳立景王湛爲皇太子癸丑降死罪以下賜文武常參及州府
長官子爲父後者勲兩轉宗子諸親一轉是冬無冰草木萌
三年三月壬戌御史中丞牛僧孺爲戶部侍郎同中書門下平章

事癸亥淮南浙東西江南宣歙阜遣使宣撫理繫囚察官吏四月
甲午陸州獠反五月壬申京師雨雹七月丙寅黃洞蠻陷欽州九
月壬子朔日有食之十月己丑杜元穎罷辛卯黃洞蠻寇安南
四年正月辛亥降死罪以下減流人一歲賜文武官及宗子賀正
使階勳爵詔百官言事辛未以皇太子權句當軍國政事壬申
皇帝崩于清思殿年三十

敬宗睿武昭愍孝皇帝諱湛穆宗長子也母曰恭僖皇太后王氏
始封鄂王徙封景王長慶二年十二月穆宗因擊毬暴得疾不見
羣臣者三日左僕射裴度三上疏請立皇太子而翰林學士兩省
官相次皆以爲言居數日穆宗疾少間宰相李逢吉請立景王爲
皇太子四年正月穆宗崩癸酉門下侍郎平章事李逢吉攝冢宰
丙子皇太子即皇帝位于太極殿二月辛巳始聽政癸未尊母爲
皇太后皇太后爲太皇太后辛卯放掖庭內園沒入者丁未擊鞠
于中和殿戊申擊鞠于飛龍院黃洞蠻降己酉擊鞠用樂三月壬

子大赦免京畿河南青苗稅減宮禁經費乘輿服膳罷貢鷹犬元
和以來兩河藩鎮歸地者予一子官庚午太白經天四月丙申擊
鞠于清思殿染坊匠張韶反幸左神策軍韶伏誅丁酉還宮五月
乙卯吏部侍郎李程戶部侍郎判度支竇易直同中書門下平章
事六月庚辰大風壞延喜景風門是夏漢水溢八月丁亥太白晝
見丁酉中官季文德謀反伏誅黃洞蠻寇安南十一月戊午環王
及黃洞蠻陷陸州刺史葛維死之庚申葬睿聖文惠孝皇帝于
光陵

寶曆元年正月己酉朝獻于太清宮庚戌朝享于太廟辛亥有事
于南郊大赦改元乙卯牛僧孺罷四月癸巳羣臣上尊號曰文武
大聖廣孝皇帝大赦賜文武官階爵五月庚戌觀競渡于魚藻宮
九月壬午昭義軍節度使劉悟卒其子從諫自稱留後十一月丙
申封子普為晉王

二年正月甲戌發神策六軍穿池于禁中二月丁未山南西道節

度使裴度守司空同中書門下平章事三月戊寅觀競渡于魚藻宮四月戊戌橫海軍節度使李全略卒其子同捷反五月戊寅觀競渡于魚藻宮庚辰幽州盧龍軍亂殺其節度使朱克融其子延嗣自稱節度使六月辛酉觀漁于臨碧池甲子觀驢鞠角觝于三殿七月癸未衡王絢薨以漢陂隸尚食禁民漁八月丙午觀競渡于新池九月甲戌觀百戲于宣和殿三日而罷戊寅幽州盧龍軍兵馬使李載義殺朱延嗣自稱留後壬午李程罷十一月甲申李逢吉罷己丑禁朝官方鎮置私白身十二月中官劉克明反辛丑皇帝崩年十八

文宗元聖昭獻孝皇帝諱昞穆宗第二子也母曰貞獻皇太后蕭氏始封江王寶曆二年十二月敬宗崩劉克明等矯詔以絳王悟旬當軍國事壬寅內樞密使王守澄楊承和神策護軍中尉魏從簡梁守謙奉江王而立之率神策六軍飛龍兵誅克明殺絳王乙巳江王即皇帝位于宣政殿戊申始聽政尊母為皇太后庚戌兵

部侍郎翰林學士韋處厚爲中書侍郎同中書門下平章事庚申
出宮人三千省教坊樂工翰林伎術冗員千二百七十人縱五坊鷹
犬停貢纂組雕鏤金筐寶飾牀榻

大和元年二月乙巳大赦改元免京兆今歲夏稅半賜九廟陪位
者子孫二階立功將士階爵始封諸王後子一子出身五月戊辰
罷宰臣奏事監搜丙子橫海軍節度使烏重胤討李同捷六月
癸巳淮南節度副大使王播爲尚書左僕射同中書門下平章事
乙卯以旱降京畿死罪以下七月癸酉葬睿武昭愍孝皇帝于莊
陵十一月庚辰橫海軍節度使李元瓘討李同捷十二月庚戌王智
興爲滄州行營招撫使

二年正月壬申地震六月乙卯晉王普薨己巳大風拔木乙亥峯
州刺史王昇朝反伏誅是夏河溢壞棣州城越州海溢七月辛丑
魏博節度使史憲誠及同捷戰于平原敗之甲辰有彗星出于右
攝提八月己巳王庭湊反壬申義武軍節度使柳公濟及庭湊戰

于新樂敗之己卯劉從諫又敗之于臨城辛巳史憲誠及李同捷戰于平原敗之癸未劉從諫及王庭湊戰于昭慶敗之九月癸卯柳公濟又敗之于博野丁未岳王緝薨庚戌安南軍亂逐其都護韓約十月庚申史憲誠及李同捷戰于平原敗之丁卯洋王忻薨癸酉竇易直罷戊寅史憲誠及李同捷戰于平原敗之壬午幽州盧龍軍節度使李載義又敗之于長蘆十一月壬辰給復棣州一年稟戰士創廢者終身甲辰昭德寺火十二月乙丑魏博行營兵馬使丁志沼反壬申韋處厚薨戊寅兵部侍郎翰林學士路隋爲中書侍郎同中書門下平章事

三年正月丁亥宣武河陽兵討丁志沼庚子志沼奔于鎮州三月乙酉罷教坊日直樂工乙巳以太原兵馬使傅毅爲義武軍節度使義武軍不受命都知兵馬使張璠自稱節度使戊申以璠爲義武軍節度使四月戊辰滄景節度使李祐克德州李同捷降乙亥滄德宣慰使栢耆以同捷歸于京師殺之于將陵五月辛卯給復

滄景德棣四州二年六月甲戌魏博軍亂殺其節度使史憲誠都知兵馬使何進滔自稱留後八月辛亥以相衛潭三州隸相衛節度使進滔不受命辛酉以旱免京畿九縣今歲租壬申赦王庭湊甲戌吏部侍郎李宗閔同中書門下平章事十月癸丑仗內火十一月壬辰朝獻于太清宮癸巳朝享于太廟甲午有事于南郊大赦詔毋獻難成非常之物焚絲布撩綾機杼是月雲南蠻陷雋郛二州十二月丁未鄂岳襄鄧忠武軍伐雲南蠻庚戌雲南蠻寇成都右領軍衛大將軍董重質爲左右神策及諸道行營西川都知兵馬使以伐之己未雲南蠻寇梓州壬戌寇蜀州

四年正月戊子封子永爲魯王辛卯武昌軍節度使牛僧孺爲兵部尚書同中書門下平章事甲午王播薨三月乙卯興元軍亂殺其節度使李絳三月癸卯禁京畿弋獵四月丁未奚寇邊李載義敗之六月丁未裴度平章軍國重事是夏舒州江溢七月癸未尚書右丞宋申錫同中書門下平章事九月壬午裴度罷

五年正月庚申幽州盧龍軍亂逐其節度使李載義殺莫州刺史張慶初兵馬使楊志誠自稱留後三月庚子貶宋申錫爲太子右庶子癸卯降封漳王湊爲巢縣公六月甲午梓州立武江盜

六年正月壬子降死罪以下二月蘇州地震生白毛五月庚申給民疫死者棺十歲以下不能自存者二月糧七月戊申原王達薨十一月甲子立魯王永爲皇太子十二月乙丑牛僧孺罷己巳珍王誠薨

七年正月壬辰罷吳蜀冬貢茶二月丙戌兵部尚書李德裕同中書門下平章事三月辛卯幽州盧龍軍節度使楊志誠執春衣使邊奉鸞送奚契丹使尹士恭辛丑和王綺薨六月甲戌地震乙亥李宗閔罷七月壬寅尚書右僕射諸道鹽鐵轉運使王涯同中書門下平章事閏月乙卯以旱避正殿減膳徹樂出宮女千人縱五坊鷹犬八月庚寅降死罪以下賜文武及州府長官子爲父後者勳兩轉十二月庚子不豫

八年二月壬午朔日有食之庚寅以疾愈降死罪以下四月丙戌詔答罪毋鞭背五月己巳飛龍神駒中殿火六月丙戌莒王紆薨七月辛酉震定陵寢宮癸亥鄆王經薨九月辛亥有彗星出于太微十月辛巳幽州盧龍軍大將史元忠逐其節度使揚志誠自稱權句當節度兵馬庚寅山南西道節度使李宗閔爲中書侍郎同中書門下平章事甲午李德裕罷十一月癸丑成德軍節度使王庭湊卒其子元逵自稱權句當節度事丙子莫州軍亂逐其刺史張惟汎十二月己卯降京畿死罪以下

九年正月癸亥巢縣公湊薨二月辛亥異王綽薨乙卯京師地震四月丙申路隋罷戊戌浙江東道觀察使賈諫爲中書侍郎同中書門下平章事辛丑大風拔木落含元殿鴟尾壞門觀五月辛未王涯爲司空六月壬寅貶李宗閔爲明州刺史七月辛亥御史大夫李固言爲門下侍郎同中書門下平章事九月癸亥殺陳弘志丁卯李固言罷己巳御史中丞舒元興爲刑部侍郎翰林學士兵

部郎中李訓爲禮部侍郎同中書門下平章事十月辛巳殺觀軍容使王守澄十一月乙巳殺武寧軍監軍使王守洵王戌李訓及河東節度使王璠邠寧節度使郭行餘御史中丞李孝本京兆少尹羅立言謀誅中官不克訓奔于鳳翔甲子尚書右僕射鄭覃同中書門下平章事乙丑權知戶部侍郎李石同中書門下平章事左神策軍中尉仇士良殺王涯賈餗舒元興李孝本羅立言王璠郭行餘鳳翔少尹魏逢戍辰晝晦鳳翔監軍使張仲清殺其節度使鄭注已巳仇士良殺右金吾衛大將軍韓約十二月壬申殺左金吾衛將軍李貞素翰林學士顧師邕丁亥降京師死罪以下

開成元年正月辛丑朔日有食之大赦改元免大和五年以前逋負京畿今歲稅賜文武官階爵二月乙亥停獻鷩鳥畋犬三年京師地震四月辛卯淄王協薨甲午山南西道節度使李固言爲門下侍郎同中書門下平章事七月濔沱溢乙亥雨土十二月己未
澈王縱薨

二年二月丙午有彗星出于東方己未均王緯薨三月丙寅以彗見減膳壬申素服避正殿徹樂降死罪沐以下原之縱五坊鷹隼禁京畿採捕四月戊戌工部侍郎陳夷行同中書門下平章事乙卯以旱避正殿六月丙午河陽軍亂逐其節度使李泳己未綿州獠反七月癸亥党項羌寇振武八月庚戌封兄子休復爲梁王執中襄王言楊杞王成美陳王癸丑封子宗儉爲蔣王十月戊申李固言罷十一月乙丑京師地震丁丑有星隕于興元

三年正月甲子盜傷李石戊申大風拔木諸道鹽鐵轉運使戶部尚書楊嗣復戶部侍郎李珣同中書門下平章事丙子李石罷夏漢水溢八月己亥嘉王運薨十月乙酉義武軍節度使張璠卒其子元益自稱留後庚子皇太子薨乙巳有彗星出于軫十一月壬戌降死罪以下

四年正月癸酉有彗星出于羽林閏月丙午出于卷舌五月丙申鄭覃陳夷行罷七月甲辰太常卿崔鄆同中書門下平章事八月

辛亥鄜王懌薨十月丙寅立陳王成美爲皇太子甲戌地震十一月
己亥降京畿死罪以下十二月乙卯乾陵寢宮火

五年正月戊寅不豫己卯左右神策軍護軍中尉魚弘志仇士良
立潁王漣爲皇太弟權句當軍國事廢皇太子成美爲陳王庚辰
仇士良殺仙韶院副使尉遲璋辛巳皇帝崩于太和殿年三十三
武宗至道昭肅孝皇帝諱炎穆宗第五子也母曰宣懿皇太后韋
氏始封潁王累加開府儀同三司檢校吏部尚書開成五年正月
文宗疾大漸神策軍護軍中尉仇士良魚弘志矯詔廢皇太子成
美復爲陳王立潁王爲皇太弟辛巳即皇帝位于柩前辛卯殺陳
王成美及安王溶賢妃楊氏甲午始聽政追尊母爲皇太后二月
乙卯大赦庚申有彗星出于室壁四月甲子大風拔木五月己卯
楊嗣復罷諸道鹽鐵轉運使刑部尚書崔珙同中書門下平章事
壬寅大風拔木六月丙寅以旱避正殿理囚河北河南淮南浙東
福建蝗疫州除其徭七月戊寅大風拔木八月甲寅雨壬戌葬元

聖昭獻孝皇帝于章陵內樞密使劉弘逸薛季稜以兵殺仇士良不克伏誅庚午李珣罷九月丁丑淮南節度副大使李德裕爲門下侍郎同中書門下平章事十月癸卯回鶻寇天德軍十一月戊寅有彗星出于東方魏博節度使何進滔卒其子重霸自稱留後十二月封子峻爲杞王

會昌元年正月己卯朝獻于太清宮庚辰朝真于太廟辛巳有事于南郊大赦改元三月御史大夫陳夷行爲門下侍郎同中書門下平章事七月有彗星出于羽林壬辰漢水溢九月癸巳幽州盧龍軍將陳行泰殺其節度使史元忠自稱知留務閏月幽州盧龍軍將張絳殺行泰自稱主軍務十月幽州盧龍軍逐絳雄武軍使張仲武入于幽州十一月壬寅有彗星出于營室辛亥避正殿減膳理囚罷興作癸亥崔鄆罷

二年正月宋亳二州地震己亥李德裕爲司空回鶻寇橫水柵略天德振武軍二月丁丑淮南節度副大使李紳爲中書侍郎同中

書門下平章事三月回鶻寇雲朔四月丁亥羣臣上尊號曰仁聖
文武至神大孝皇帝大赦賜文武官階勲爵五月丙申回鶻盟沒
斯降六月陳夷行罷河東節度使劉訥及回鶻戰于雲州敗績七
月幸左神策軍閱武尚書右丞兼御史中丞李讓夷爲中書侍郎
同中書門下平章事嵐州民田滿川反伏誅回鶻可汗寇大同川
九月劉訥爲回鶻南面招撫使幽州盧龍軍節度使張仲武爲東
面招撫使右金吾衛大將軍李思忠爲河西党項都將西南面招
討使十月丁卯封子峴爲益王岐兗王十一月獵于白鹿原十二
月封子嶧爲德王嶧昌王癸未京師地震

三年正月庚子天德軍行營副使石雄及回鶻戰于殺胡山敗之
二月庚申朔日有食之辛未崔珙罷是春大雨雪四月乙丑昭義
軍節度使劉從諫卒其子稹自稱留後五月甲午震東都廣運
樓災辛丑成德軍節度使王元逵爲北面招討澤潞使魏博節度
使何弘敬爲東面招討澤潞使及河中節度使陳夷行河陽節度

使王茂元劉沔以討劉稹戊申翰林學士承旨中書舍人崔鉉爲中書侍郎同中書門下平章事武寧軍節度使李彦佐爲晉絳行營諸軍節度招討使六月西內神龍寺火辛酉李德裕爲司徒是夏作望仙觀于禁中七月庚子免河東今歲秋稅九月辛卯忠武軍節度使王宰兼河陽行營攻討使丁未以雨霖理囚免京兆府秋稅十月己巳晉絳行營節度使石雄及劉稹戰于烏嶺敗之王午日中月食太白是月党項羌寇鹽州十一月寇邠寧充王岐爲靈夏六道元帥安撫党項大使御史中丞李回副之安南軍亂逐其經略使武渾十二月丁巳王宰克天井關

四年正月乙酉河東將楊弁逐其節度使李石二月甲寅朔日有食之辛酉楊弁伏誅三月石雄兼翼氏行營攻討使晉州刺史李丕副之六月己未中書門下御史臺慮囚閏七月壬戌李紳罷淮南節度副大使杜棕爲尚書右僕射兼中書侍郎同中書門下平章事丙子昭義軍將裴問及邢州刺史崔嘏以城降是月銘州刺

史王釗磁州刺史安玉以城降八月乙未昭義軍將郭誼殺劉稹以降
戊戌給復澤潞邢洛磁五州一歲免太原河陽及懷陝晉絳四州
秋稅戊申李德裕爲太尉十月獵于鄆縣十二月獵于雲陽

五年正月己酉羣臣上尊號曰仁聖文武章天成功神德明道大
孝皇帝是日朝獻于太清宮庚戌朝享于太廟辛亥有事于南郊
大赦賜文武官階勲爵文宣公三王三恪子一子出身作仙臺于
南郊庚申皇太后崩三月旱五月壬子葬并恭僖皇太后于光陵壬
戌杜棕崔鉉罷乙丑戶部侍郎李回爲中書侍郎同中書門下平
章事六月甲申作望仙樓于神策軍七月丙午朔日有食之是月
山南東道節度使鄭肅檢校尚書右僕射同中書門下平章事八
月壬午大毀佛寺復僧尼爲民十月作昭武廟于虎牢關

六年二月癸酉以旱降死罪以下免今歲夏稅庚辰夏綏銀節度
使米暨爲東北道招討党項使三月壬戌不豫左神策軍護軍中
尉馬元贇立光王怡爲皇太叔權句當軍國政事甲子皇帝崩于

大明宣宗年三十三

宣宗元聖至明成武獻文睿智章仁神聰懿道大孝皇帝諱忱憲宗第三子也母曰孝明皇太后鄭氏始封光王性嚴重寡言宮中或以爲不惠會昌六年武宗疾大漸左神策軍護軍中尉馬元贄立光王爲皇太叔三月甲子即皇帝位于柩前四月乙亥始聽政尊母爲皇太后丙子李德裕罷辛卯李讓夷爲司空五月乙巳大赦翰林學士承旨兵部侍郎白敏中同中書門下平章事辛酉封子溫爲鄆王侯雍王涇雅王滋蔓王沂慶王七月李讓夷罷八月辛未大行宮火壬申苑井至道昭肅孝皇帝于端陵九月鄭肅罷兵部侍郎判度支盧商爲中書侍郎同中書門下平章事雲南蠻寇安南經略使裴元裕敗之十二月戊辰朔日有食之

大中二年正月壬子朝獻于太清宮癸丑朝享于太廟甲寅有事于南郊大赦改元復左降官死者官爵賜文武官階勳父老帛文宣王後及二王後三恪子子官二月癸未以旱避正殿減膳理京

師囚罷太常教坊習樂損百官食出宮女五百人放五坊鷹犬停飛龍馬

盧商罷刑部尚書判度支崔元式爲門下侍郎翰林

學士承旨戶部侍郎韋琮爲中書侍郎同中書門下平章事閏月大復佛寺四月己酉皇太后崩五月張仲武及奚北部落戰敗之吐蕃回鶻寇河西河東節度使王宰伐之八月丙申李回罷庚子葬貞獻皇太后于光陵十二月戊午貶太子少保李德裕爲潮州司馬

二年正月甲子羣臣上尊號曰聖敬文思和武光孝皇帝大赦宗子房未仕者予一人出身賜文武官階勳爵三月封子澤爲僕王五月己未朔日有食之崔元式罷兵部侍郎判度支周焜刑部侍郎諸道鹽鐵轉運使馬植同中書門下平章事己卯太皇太后崩七月己巳續圖功臣于凌煙閣十一月壬午葬懿安太皇太后于景陵貶韋琮爲太子賓客分司東都

三年二月吐蕃以秦原安樂三州石門驛藏木峽制勝六盤石峽

蕭七關歸于有司三月詔待制官與刑法官諫官次對馬植罷是春隕霜殺桑四月乙酉周墀罷御史大夫崔鉉爲中書侍郎兵部侍郎判戶部事魏扶同中書門下平章事癸巳幽州盧龍軍節度使張仲武卒其子直方自稱留後五月武寧軍亂逐其節度使李廓十月辛巳京師地震是月振武及天德靈武鹽夏二州地震吐蕃以維州歸于有司十一月己卯封弟惕爲彭王十二月吐蕃以扶州歸于有司

四年正月庚辰大赦四月壬申以雨霖詔京師關輔理囚蠲度支鹽鐵戶部逋負六月戊申魏扶薨戶部尚書判度支崔龜從同中書門下平章事八月幽州盧龍軍亂逐其節度使張直方衙將張允伸自稱留後十月辛未翰林學士承旨兵部侍郎令狐綯同中書門下平章事十一月党項羌寇邠寧十二月鳳翔節度使李安業河東節度使李拭爲招討党項使

五年三月白敏中爲司空招討南山平夏党項行營兵馬都統四

月赦平夏党項羌辛未給復靈鹽夏三州邠寧鄜坊等道三歲六月封子潤爲鄂王八月乙巳赦南山党項羌十月沙州人張義潮以瓜沙伊肅鄯甘河西蘭岷廓十一州歸于有司白敏中罷戊辰戶部侍郎判戶部魏謩同中書門下平章事十一月崔龜從罷十二月盜斫景陵門戟是歲湖南饑

六年三月有彗星出于紫參七月雍王漢薨八月禮部尚書諸道鹽鐵轉運使裴休同中書門下平章事九月僚寇昌資二州十一月封弟惲爲棣王是歲淮南饑

七年正月丙午朝獻于太清宮丁未朝享于太廟戊申有事于南郊大赦

八年正月丙戌朔日有食之三月以旱理囚九月封子洽爲懷王

納昭王汶康王

九年正月甲申成德軍節度使王元逵卒其子紹鼎自稱留後閏四月辛丑禁嶺外民鬻男女者七月以旱遣使巡撫淮南減上供

饋運蠲逋租發粟賑民丙辰崔鉉罷庚申罷淮南宣歙浙西冬至元日常貢以代下戶租稅是月浙江東道軍亂逐其觀察使李訥十年正月丁巳御史大夫鄭朗爲工部尚書同中書門下平章事九月封子權爲衛王十月戊子裴休罷十二月壬辰戶部侍郎判戶部崔慎由爲工部尚書同中書門下平章事

十一年二月辛巳魏謩罷五月容管軍亂逐其經略使王球七月庚子兵部侍郎判度支蕭遼同中書門下平章事成德軍節度副大使王紹鼎卒其弟紹懿自稱留後八月封子灘爲廣王九月乙未彗星出于房十月壬申鄭朗罷

十二年正月戊戌戶部侍郎判度支劉瑒同中書門下平章事二月廢穆宗忌日停光陵朝拜及守陵宮人壬申崔慎由罷閏月自十月不雨至于是月雨三月鹽州監軍使楊玄价殺其刺史劉皐四月庚子嶺南軍亂逐其節度使楊發戊申兵部侍郎諸道鹽鐵轉運使夏侯孜同中書門下平章事五月丙寅劉瑒薨庚辰湖南

軍亂逐其觀察使韓琮六月丙申江西都將毛鶴逐其觀察使鄭憲辛亥南蠻寇邊七月容州將來正反伏誅八月宣歙將康全泰逐其觀察使鄭薰淮南節度使崔鉉兼宣歙池觀察處置使以討之丁巳太原地震十月康全泰伏誅十二月毛鶴伏誅甲寅兵部侍郎判戶部蔣伸同中書門下平章事

十三年正月戊午大赦蠲度支戶部逋負放宮人八月壬辰左神策軍護軍中尉王宗實立鄜王溫爲皇太子權句當軍國政事癸巳皇帝崩于咸寧殿年五十謚曰聖武獻文孝皇帝咸通十三年加謚元聖至明成武獻文睿智章仁神聰懿道大孝皇帝

贊曰春秋之法君弑而賊不討則深責其國以爲無臣子也憲宗之弑歷三世而賊猶在至於文宗不能明弘志等罪惡以正國之典刑僅能殺之而已是可歎也穆敬昏童失德以其在位不久故天下未至於敗亂而敬宗卒及其身是豈有討賊之志哉文宗恭儉儒雅出於天性嘗讀太宗政要慨然慕之及即位銳意於治每

延英對宰臣率漏下十二刻唐制天子以隻日視朝乃命輟朝放朝皆用隻日凡除吏必召見訪問親察其能否故大和之初政事脩飭號爲清明然其仁而少斷承父兄之敝太官官撓權制之不得其術故其終困以此甘露之事禍及忠良不勝冤憤飲恨而已由是言之其能殺弘志亦足伸其志也昔武丁得一傅說爲商高宗武宗用一李德裕遂成其功烈然其奮然除去浮圖之法甚銳而躬受道家之籙服藥以求長年以此見其非明智之不惑者特好惡有不同爾宣宗精於聽斷而以察爲明無復仁恩之意嗚呼自是而後唐衰矣

本紀第八

本紀第九

唐書九

翰林學士兼龍圖閣學士朝散大夫給事中知制誥充史館脩撰臣歐陽脩奉

敕撰

懿宗昭聖恭惠孝皇帝諱淮宣宗長子也母曰元昭皇太后竈氏始封鄆王宣宗愛薨王滋欲立爲皇太子而鄆王長故久不決大中十三年八月宣宗疾大漸以薨王屬內樞密使王歸長馬公儒宣徽南院使王居方等而左神策護軍中尉王宗實副使元實矯詔立鄆王爲皇太子癸巳即皇帝位于柩前王宗實殺王歸長馬公儒王居方庚子始聽政癸卯令狐綯爲司空尊皇太后曰太皇太后九月庚申追尊母爲皇太后十月辛卯大赦賜文武官階勳爵耆老粟帛十一月戊午蕭鄴罷十二月甲申翰林學士承旨兵部侍郎杜審權同中書門下平章事丁酉令狐綯罷荆南節度使白敏中爲司徒兼門下侍郎同中書門下平章事是歲雲南蠻陷播州咸通元年正月浙東人仇甫反安南經略使王式爲浙江東

道觀察使以討之二月丙申葬聖武獻文孝皇帝于貞陵五月京師地震袁王紳薨七月封叔恆爲信王八月衛王灌薨己卯仇甫伏誅九月戊申白敏中爲中書令十月安南都護李鄴克播州己亥夏侯孜罷戶部尚書判度支畢誠爲禮部尚書同中書門下平章事閏月乙亥朝獻于太清宮十一月丙子朝享于太廟丁丑有事于南郊大赦改元是月慶王沂薨十二月戊申雲南蠻寇安南癸亥福王綰爲司空二年二月白敏中罷尚書左僕射判度支杜棕兼門下侍郎同中書門下平章事福王綰薨六月鹽州刺史王寬爲安南經略招討使八月雲南蠻寇邕州九月寇雋州

三年正月庚午羣臣上尊號曰睿文明聖孝德皇帝大赦是月蔣伸罷二月庚子杜棕爲司空是月棣王湍薨湖南觀察使蔡襲爲安南經略招討使三月戊寅歸義軍節度使張義潮克涼州七月武寧軍亂逐其節度使溫璋劍南西川節度使夏侯孜爲尚書左僕射兼門下侍郎同中書門下平章事九月嶺南西道軍亂逐其

節度使蔡京十月丙申封子侑爲魏王從涼王佶蜀王杜棕爲司徒
十一月封叔祖緝爲蘄王叔憤榮王雲南蠻寇安南丙寅降囚罪
免徐州秋稅十二月翼王緡薨

四年正月戊辰朝獻于太清宮己巳朝享于太廟庚午有事于南
郊大赦雲南蠻陷安南蔡襲死之庚辰撫王紘爲司空二月拜十
六陵秦州經略使高駢爲安南經略招討使四月畢誠罷五月己
巳翰林學士承旨兵部侍郎楊收同中書門下平章事戊子杜審
權罷閏六月杜棕罷兵部侍郎判度支曹確同中書門下平章事
七月辛卯朔日有食之免安南戶稅丁錢二歲弛廉州珠池禁八
月蔓王滋薨十二月乙酉昭義軍亂殺其節度使沈詢

五年正月丙午雲南蠻寇雋州三月寇邕州四月兵部侍郎判戶
部蕭寘同中書門下平章事五月丁酉瘞邕雋州死事者己亥有
彗星出于婁八月丁卯夏侯孜爲司空十月貞陵隊陷十月戊戌
夏侯孜罷壬寅翰林學士承旨兵部侍郎路巖同中書門下平

章事

六年三月蕭肅寔薨四月劔南東川節度使高璩為兵部侍郎同中書門下平章事五月高駢及雲南蠻戰于邕州敗之六月高璩薨御史大夫徐商為兵部侍郎同中書門下平章事七月封子侃為郢王十二月晉絳二州地震壬子太皇太后崩

七年二月戊申免河南府同華陝虢四州一歲稅湖南及桂邕容三管岳州夏秋稅之半三月成德軍節度使王紹懿卒其兄子景崇自稱留後閏月吐蕃寇邠寧五月甲辰葬孝明太皇太后于景陵之園六月魏博節度使何弘敬卒其子全皞自稱留後八月辛卯晝晦十月壬申楊收罷是月高駢克安南十一月辛亥大赦免咸通三年以前逋負賜文武官階勲爵

八年正月丁未河中府晉絳二州地震五月丙辰以不豫降囚罪出宮人五百縱神策五坊飛龍鷹鷂林延慶端午節獻女口七月雨湯于下邳壬寅斬王緝薨乙巳懷州民亂逐其刺史劉仁規甲

子兵部侍郎諸道鹽鐵轉運使于琮同中書門下平章事十一月
辛丑疾愈避正殿賜民年七十而痼疾及軍士戰傷者帛十二月
信王怙薨

九年正月有彗星出于婁胃七月武寧軍節度糧料判官龐勛反
于桂州十月庚午陷宿州丁丑陷徐州觀察使崔彥曾死之十一
月陷濠州刺史盧瑋回死之右金吾衛大將軍康承訓為徐泗行
營兵馬都招討使神武大將軍王晏權為北面招討使羽林將軍
戴可師為南面招討使十二月龐勛陷和滁二州滁州刺史高錫
望死之王申戴可師及龐勛戰于都梁山死之是月前天雄軍節
度使馬舉為南面招討使泰寧軍節度使曹翔為北面招討使

十年二月殺驩州流人楊收三月徙封侃為威王四月殺鎮南軍
節度使嚴譔康承訓及龐勛戰于柳子敗之六月神策軍將軍宋
威為西北面招討使戊戌以蝗旱理囚癸卯徐商罷翰林學士承
旨戶部侍郎劉瞻同中書門下平章事八月有彗星出于大陵九

月癸酉龐勛伏誅十月戊戌免徐宿濠泗四州三歲稅役十二月
壬子雲南蠻寇嘉州

十二年正月甲寅羣臣上尊號曰睿文英武明德至仁大聖廣孝
皇帝大赦雲南蠻寇黎雅二州及成都二月甲申劔南西川節度
副使王建立及雲南蠻戰于城北死之甲午劔南東川節度使顏
慶復及雲南蠻戰于新都敗之三月曹確罷四月丙午翰林學士
承旨兵部侍郎韋保衡同中書門下平章事八月殺醫待詔韓宗
紹魏博軍亂殺其節度使何全晬其將韓君雄自稱留後九月丙
辰劉瞻罷十一月辛亥禮部尚書判度支王鐸同中書門下平章事
十二年四月癸卯路巖罷五月庚申理囚十月兵部侍郎諸道鹽
鐵轉運使劉鄩爲禮部尚書同中書門下平章事

十三年二月丁巳于琮罷刑部侍郎判戶部趙隱爲戶部侍郎同
中書門下平章事幽州盧龍軍節度使張允伸卒其子簡會自稱
留後三月癸酉平州刺史張公素逐簡會自稱留後四月庚子浙

江東西道地震封子保爲吉王傑壽王倚睦王五月乙亥殺國子司業韋殷裕十一月王鐸爲司徒韋保衡爲司空

十四年正月沙陀寇代北三月迎佛骨于鳳翔癸巳雨土四月并州民產子二頭四手王寅大赦六月不豫王鐸罷七月辛巳皇帝崩于咸寧殿年四十一

僖宗惠聖恭定孝皇帝諱僖懿宗第五子也母曰惠安皇太后王氏始封普王名儼咸通十四年七月懿宗疾大漸左右神策護軍中尉劉行深韓文約立普王爲皇太子辛巳即皇帝位于柩前八月癸巳始聽政丁未追尊母爲皇太后乙卯韋保衡爲司徒九月貶保衡爲賀州刺史十月乙未尚書左僕射蕭倣爲中書侍郎同中書門下平章事十二月震電癸卯大赦免水旱州縣租賦罷貢鷹鷂雲南繼寇黎州

乾符元年二月甲午葬昭聖恭惠孝皇帝于簡陵癸丑降死罪以下趙隱罷華州刺史裴坦爲中書侍郎同中書門下平章事四月

辛卯以旱理囚五月乙未裴坦薨刑部尚書劉瞻爲中書侍郎同中書門下平章事八月辛未瞻薨兵部侍郎判度支崔彥昭爲中書侍郎同中書門下平章事十月劉鄴罷吏部侍郎鄭畋爲兵部侍郎翰林學士承旨戶部侍郎盧攜同中書門下平章事十一月庚寅改元羣臣上尊號曰聖神聰睿仁哲明孝皇帝是月蕭倣爲司空魏博節度使韓允中卒其子簡自稱留後十二月党項回鶻寇天德軍雲南蠻寇黎雅二州河西河東山南東道東川兵伐雲南二年正月己丑朝獻于太清宮庚寅朝享于太廟辛卯有事于南郊大赦賜文武官階勳爵文宣王及二王後三恪一子官雲南蠻請和四月庚辰太白晝見浙西突陣將王郢反五月右龍武軍大將軍宋皓討之蕭倣薨六月濮州賊王仙芝尚君長陷曹濮二州河南諸鎮兵討之吏部尚書李蔚爲中書侍郎同中書門下平章事幽州將李茂勳逐其節度使張公素自稱留後七月以蝗避正殿減膳十一月震電

三年二月丙子以旱降死罪以下三月葬暴骸平盧軍節度使宋威爲指揮諸道招討草賊使檢校左散騎常侍曾元裕副之募能捕賊三百人者官以將軍幽州盧龍軍節度使李茂勲立其子可舉爲留後五月庚子以旱理囚免浙東西一歲稅昭王訥薨六月乙丑雄州地震撫王絃爲太尉七月辛巳雄州地震鎮海軍節度使裴璩及王郢戰敗之郢王潤薨九月乙亥朔日有食之避正殿丙子王仙芝陷汝州執刺史王鐸十一月陷郢復二州十二月京師地震王仙芝陷申光廬壽通舒六州忠武軍節度使崔安潛爲諸道行營都統宮苑使李琢爲諸軍行營招討草賊使右威衛上將軍張自勉副之是冬無雪

四年正月丁丑降死罪以下二等流人死者聽收葬崔彥昭爲司空二月王仙芝陷鄂州閏月崔彥昭罷昭義軍亂逐其節度使高緄宣武軍節度使王鐸檢校司徒兼門下侍郎同中書門下平章事三月宛句賊黃巢陷鄆沂二州天平軍節度使薛崇死之四月

王申朝日有食之是月陝州軍亂逐其觀察使崔碣江西賊柳彥璋陷江州執其刺史陶祥高安制置使鍾傳陷撫州五月有彗星避正殿減膳六月王鐸爲司徒庚寅雄州地震八月黃巢陷隋州執刺史崔休徵九月沙陀寇雲朔二州鹽州軍亂逐其刺史王承顏十月河中軍亂逐其節度使劉侔十一月尚君長降宋威殺之十二月安南戍兵亂逐桂管觀察使李璿江州刺史劉秉仁及柳彥璋戰敗之

五年正月丁酉王仙芝陷江陵外郭壬寅曾元裕及王仙芝戰于申州敗之元裕爲諸道行營招討草賊使張自勉副之宋威罷招討使二月癸酉雲中守捉使李克用殺大同軍防禦使段文楚己卯克用寇遮虜軍是月王仙芝伏誅其將王重隱陷饒州刺史顏標死之江西賊徐唐荅陷洪州三月黃巢陷濮州寇河南崔安潛罷都統張自勉爲東西面行營招討使湖南軍亂逐其觀察使崔瑾四月饒州將彭令璋克饒州自稱刺史徐唐荅伏誅五月丁酉

鄭畋盧攜罷翰林學士承旨戶部侍郎豆盧瑑為兵部侍郎吏部侍郎崔沆為戶部侍郎同中書門下平章事是日雨雹大風拔木八月大同軍節度使李國昌陷岢嵐軍黃巢陷杭州九月李蔚罷吏部尚書鄭從謹為中書侍郎同中書門下平章事黃巢陷越州執觀察使崔琢鎮海軍將張麟克越州十月昭義軍節度使李鈞幽州盧龍軍節度使李可舉討李國昌十一月丁未河東宣慰使崔季康為河東節度代北行營招討使十二月甲戌黃巢陷福州庚辰崔季康李鈞及李克用戰于洪谷敗績是歲天平軍節度使張勣卒衙將崔君裕自知州事

六年正月鎮海軍節度使高駢為諸道行營兵馬都統魏王侑薨二月京師地震藍田山裂出水河東軍亂殺其節度使崔季康四月庚申朔日有食之涼王伾薨王鐸為荆南節度使南面行營招討都統五月泰寧軍節度使李係為湖南觀察使副之黃巢陷廣州執鎮南東道節度使李迢陷安南八月甲子東都留守李蔚為

唐書本紀九
河東節度代北行營招討使閏十月黃巢陷潭澧二州澧州刺史李絢死之十一月丙辰兩日並出而鬪戊午河東節度使康傳圭爲代北行營招討使辛酉黃巢陷江陵殺李迢丁丑山南東道節度使劉巨容及黃巢戰于荆門敗之十二月壬辰克江陵是月貶王鐸爲太子賓客分司東都兵部尚書盧攜爲門下侍郎同中書門下平章事是歲澧州刺史曹全最克鄆州殺崔君裕黃巢陷鄂宜歙池四州朗州賊周岳陷衡州逐其刺史徐顥荆南將雷滿陷朗州刺史崔翥死之石門蠻向環陷澧州權知州事呂自牧死之桂陽賊陳彥謙陷郴州刺史董岳死之

廣明元年正月乙卯改元免嶺南荆湖河中河東稅賦十之四戊寅荆南監軍楊復光泰寧軍將段彥謩殺其守將宋浩以常滋爲節度留後淮南將張麟及黃巢戰于大雲倉敗之二月丙戌李國昌寇忻代二州戊戌河東軍亂殺其節度使康傳圭壬子鄭從讜罷爲河東節度使代北行營招討使三月辛未以旱避正殿減膳

四月甲申京師東都汝州雨雹大風拔木丁酉太府卿李琢為蔚
朔招討都統壬寅張麟克饒州五月汝州防禦使諸葛爽為蔚朔
招討副使泰寧軍將劉漢宏反張麟及黃巢戰于信州死之六月
巢陷睦義蒼三州江華賊蔡結陷道州宿州賊魯景仁陷連州七
月黃巢陷滁和二州辛酉天平軍節度使曹全晟為東面副都統
辛未劉漢宏降李可舉及李國昌戰于藥兒嶺敗之八月辛卯昭
義軍亂殺其節度使李鈞癸卯榮王愐為司空是月憤薨九月忠
武軍將周岌殺其節度使薛能牙將秦宗權自稱權知蔡州事十
月黃巢陷申州十一月河中都虞候王重榮逐其節度使李都黃
巢陷汝州壬戌幸左神策軍閱武護軍中尉田令孜為諸道兵馬
都指揮制置招討使忠武軍監軍楊復光副之丁卯東都留守劉
允章叛附于黃巢壬申巢陷虢州田令孜為汝洛晉絳同華都統
十二月壬午黃巢陷潼關甲申貶盧攜為太子賓客分司東都翰
林學士承旨尚書左丞王徽為戶部侍郎翰林學士戶部侍郎裴

澈爲工部侍郎同中書門下平章事行在咸陽丙戌左金吾衛大將軍張直方率武官叛附于黃巢巢陷京師辛卯次鳳翔丙申河陽節度使諸葛爽叛附于黃巢丁酉次興元庚子廣德公主豆盧瑑崔沆尚書左僕射劉鄩右僕射于琮太子少師裴諗御史中丞趙濛刑部侍郎李溥京兆尹李湯死于黃巢是歲雨血于靖陵

中和元年正月壬子如成都壬申兵部侍郎判度支蕭繹爲工部侍郎同中書門下平章事丁丑次成都二月己卯赦劍南三川太子少師王鐸爲司徒兼門下侍郎同中書門下平章事淮南節度使高駢爲京城四面都統邠寧節度使李存禮討黃巢鳳翔節度使鄭畋及巢戰于龍尾坡敗之邠寧將王玫陷邠州戊戌清平鎮使陳晟執睦州刺史韋諸自稱刺史三月辛亥黃巢陷鄧州執刺史趙戎辛酉鄭畋爲京城西面行營都統甲子畋及涇原節度使程宗楚天雄軍經略使仇公遇盟于鳳翔是月王徽罷諸葛爽以河陽降四月戊寅王玫伏誅程宗楚朔方軍節度使唐弘夫及黃

巢戰于咸陽敗之王午巢遯于灞上丁亥復入于京師弘夫宗楚死之是月赦李國昌及其子克用以討黃巢五月丙辰克用寇太原振武軍節度使契苾璋敗之辛酉大風雨土是月劉巨容爲南面行營招討使楊復光克鄧州六月鄧賊鍾季文陷明州辛卯邠寧節度副使朱玫及黃巢戰于興平敗績戊戌鄭畋爲司空兼門下侍郎同中書門下平章事京城四面行營都統丙午李克用陷忻代二州七月丁巳大赦改元庚申翰林學士承旨兵部侍郎韋昭度同中書門下平章事丙寅神策軍將郭琪反伏誅辛未田令孜殺左拾遺孟昭圖義武軍節度使王處存爲東南面行營招討使八月感化軍將時溥逐其節度使支詳自稱留後昭義軍節度使高潯及黃巢戰于石橋敗績十將成麟殺潯入于潞州己丑衆星隕于成都九月丙午鄭延節度使李孝章夏綏銀節度使拓拔思恭及黃巢戰于東渭橋敗績臨海賊杜雄陷台州辛酉封子震爲建王己巳昭義軍戎將孟方立殺成麟自稱留後永嘉賊朱褒

陷溫州是秋河東霜殺禾十月鳳翔行軍司馬李昌言逐其節度使鄭畋十一月李昌言為鳳翔節度行營招討使鄭畋裴澈罷逐昌賊盧約陷處州十二月安南戍將閔頊逐湖南觀察使李裕自稱留後是歲霍丘鎮使王緒陷壽光二州

二年正月辛亥王鐸為諸道行營都都統承制封拜太子少師崔安潛副之高駢罷都統辛未王處存為京城東面都統李孝章為北面都統拓拔思恭為南面都統二月甲戌黃巢陷同州己卯太子少傅分司東都鄭畋為司空兼門下侍郎同中書門下平章事丙戌李昌言為京城西面都統邠寧節度使朱玫為河南都統諸谷防遏使三月邛州蠻阡能叛西川部將楊行遷討之李克用陷蔚州六月朱玫為京城西北面行營都統楊行遷及阡能戰于乾溪敗績己亥荆南監軍朱勣殺其節度使段彥謩少尹李燧自稱留後七月保大軍節度留後東方達為京城東面行營招討使撫州刺史鍾傳陷洪州江西觀察使高茂卿奔于江州八月丁巳

東方達爲京城東北面行營都統拓拔思恭爲京城四面都統魏博節度使韓簡陷孟州九月丙戌黃巢將朱溫以同州降己亥溫爲右金吾衛大將軍河中行營招討副使是月太原桃李實嶺南西道軍亂逐其節度使張從訓平盧軍將王勣武逐其節度使安師儒自稱留後十月嵐州刺史湯羣以沙陀反韓簡寇鄆州天平軍節度使曹全晟死之部將崔用自稱留後諸葛爽陷孟州十一月荆南軍亂衙將陳儒自稱留後丙子湯羣伏誅是歲關中大饑南城賊危全諷陷撫州危仔倡陷信州廬州將楊行密逐其刺史郎幼復和州刺史秦彥逐宣歙觀察使竇滂

三年正月鴈門節度使李克用爲京城東北面行營都統乙亥王鐸罷二月魏博軍亂殺其節度使韓簡其將樂彥禎自稱留後己未建王震爲太保三月天有聲于浙西壬申李克用及黃巢戰于零口敗之四月甲辰又敗之于渭橋丙午復京師五月鄭畋爲司徒東都留守檢校司空鄭從謹爲司空同中書門下平章事淮南

將張瓌陷復州奉國軍節度使秦宗權叛附于黃巢七月宣武軍節度副大使朱全忠爲東北面都招討使鄭畋罷兵部尚書判度支裴澈同中書門下平章事八月黃巢秦宗權寇陳州淮南將韓師德陷岳州九月武寧軍節度使時溥爲東面兵馬都統是秋晉州地震十月全椒賊許勅陷滁州李克用陷潞州刺史李勣銳死之十一月壬申劍南西川行軍司馬高仁厚及阡能戰于邛州敗之十二月忠武軍將鹿晏弘逐興元節度使牛勗自稱留後是歲天平軍將曹存實克鄆州石鎮鎮將董昌逐杭州刺史路審中四年正月婺州將王鎮執其刺史黃碣叛附于董昌二月鎮伏誅浦陽將蔣瓌陷婺州舒州賊吳迴逐其刺史高彥三月甲子劍南東川節度副大使楊師立反西川節度使陳勣瑄爲西川東川山南西道都指揮招討使前杭州刺史路審中陷鄂州五月辛酉朱全忠及黃巢戰敗之辛未河東節度使李克用及巢戰于宛句敗之癸酉高仁厚爲劍南東川節度使以討楊師立壬午福建團練

副使陳巖逐其觀察使鄭鎰自稱觀察使六月乙卯赦劍南三川
瘞京畿骸骨七月辛酉楊師立伏誅壬午黃巢伏誅九月山南西
道節度使鹿晏弘反十月蕭遘為司空十一月鹿晏弘陷許州殺
節度使周岌自稱留後十二月甲午荆南行軍司馬張瓌逐其節
度使陳儒自稱留後盜殺義昌軍節度使王鐸是歲關中大饑濮
州刺史朱宣逐天平軍節度使曹存實自稱留後武昌軍將杜洪
陷岳州

光啓元年正月庚辰荆南軍將成汭陷歸州是月王緒陷汀漳二
州南康賊盧光稠陷虔州三月丁卯至自成都己巳大赦改元時
溥為蔡州四面行營兵馬都統蕭遘為司徒韋昭度為司空四月
吳迴伏誅秦宗權陷襄州山南東道節度使劉巨容奔于成都武
當賊馮行襲陷均州逐其刺史呂燁五月羣臣上尊號曰至德光
烈皇帝六月幽州盧龍軍亂殺其節度使李可舉其將李全忠自
稱留後壬戌秦宗權陷東都七月義昌軍亂逐其節度使楊全孜

衙將盧彥威自稱留後八月光州賊王潮執王緒甲寅殺右補闕
常濬樂彥禎殺洺州刺史馬爽九月河中節度使王重榮反邠寧
節度使朱玫討之十月癸丑朱全忠及秦宗權戰于雙丘敗績十
一月河東節度使李克用叛附于王重榮重榮及克用寇同州刺
史郭璋死之十二月癸酉朱玫及王重榮李克用戰于沙苑敗績
乙亥克用犯京師丙子如鳳翔

二年正月辛巳鎮海軍將張郁陷常州戊子如興元癸巳朱玫叛
寇鳳翔二月鄭從謹為太傅三月壬午山南西道節度使石君涉
奔于鳳翔遂州刺史鄭君雄陷漢州丙申次興元戊戌御史大夫
孔緯翰林學士承旨兵部尚書杜讓能為兵部侍郎同中書門下
平章事是春成都地震鳳翔女子化為丈夫四月乙卯朱玫以嗣
襄王煊入于京師五月丙戌有星孛于箕尾武寧軍將丁從實陷
常州逐其刺史張郁六月淮西將黃皓殺欽化軍節度使閔頊衡
州刺史周岳陷潭州自稱節度使七月秦宗權陷許州忠武軍節

度使鹿晏弘死之八月王潮陷泉州刺史廖彥若死之幽州盧龍軍節度使李全忠卒其子匡威自稱留後九月有星隕于揚州戊寅靜難軍將王行瑜陷興鳳二州十月丙午嗣襄王煊自立為皇帝尊皇帝為太上元皇聖帝朱全忠陷滑州執義成軍節度使安師儒丙辰杭州刺史董昌攻越州浙東觀察使劉漢宏奔于台州是月河陽節度使諸葛爽卒其子仲方自稱留後神策行營先鋒使滿存克興鳳二州感義軍節度使楊晟陷文州武寧軍將張雄陷蘇州十一月庚子秦宗權陷鄭州十二月魏州地震丙午台州刺史杜雄執劉漢宏降于董昌昌自稱浙東觀察使丙辰朱玫伏誅丁巳煊伏誅秦宗權陷孟州諸葛仲方奔于汴州是歲天平軍將朱瑾逐秦寧軍節度使齊克讓自稱留後湘陰賊鄧進思陷岳州杜洪陷鄂州自稱武昌軍節度留後

三年三月癸未蕭遘裴澈兵部侍郎鄭昌圖有罪伏誅壬辰如鳳翔鄭從謹罷韋昭度為司徒癸巳鎮海軍將劉浩逐其節度使周

寶度支催勘使薛昉自稱知府事四月甲辰六合鎮遏使徐約陷蘇州逐其刺史張雄甲子淮南兵馬使畢師鐸陷揚州執其節度使高駢是月維州山崩五月甲戌宣歙觀察使秦彥入于揚州癸未秦宗權陷鄭州六月陷孟州河陽將李罕之入于孟州張全義入于東都已酉鳳翔節度使李昌符反庚戌犯大安門不克奔于隴州壬子武定軍節度使李茂貞爲隴州招討使丁巳護國軍將常行儒殺其節度使王重榮其兄重盈自稱留後壬戌亳州將謝殷逐其刺史宋衮七月丁亥降死罪以下貞觀開元建中興元功臣後子一子九品正貲官減常膳三之一賜民九十以上粟帛七月李昌符伏誅八月韋昭度爲太保壬寅謝殷伏誅朱全忠陷亳州壬子陷曹州刺史丘弘禮死之九月戶部侍郎判度支張濬爲兵部侍郎同中書門下平章事秦彥殺高駢十月丁未朱全忠陷濮州甲寅封子陞爲益王杭州刺史錢鏐陷常州丁卯鏐殺周寶是月秦宗權將孫儒寇揚州十一月壬申廬州刺史楊行密陷揚

州秦彥畢師鐸奔于孫儒十二月癸巳淮西將趙德諤陷江陵荆南節度使張瓌死之朱全忠爲東南面招討使饒州刺史陳儒陷衢州上蔡賊馮勣章陷蘄州

文德元年正月甲寅孫儒殺秦彥畢師鐸癸亥朱全忠爲蔡州四面行營都統丙寅薛朗伏誅錢鏐陷潤州二月乙亥不豫己丑至自鳳翔庚寅謁于太廟大赦改元是月魏博軍亂殺其節度使樂彥禎其將羅弘信自稱權知留後三月戊戌朔日有食之旣壬寅疾大漸立壽王傑爲皇太弟知軍國事癸卯皇帝崩于武德殿年二十七

贊曰唐自穆宗以來八世而爲宦官所立者七君然則唐之衰亡豈止方鎮之患蓋朝廷天下之本也人君者朝廷之本也始即位者人君之本也其本始不正欲以正天下其可得乎懿僖當唐政之始衰而以昏庸相繼乾符之際歲大旱蝗民愁盜起其亂遂不可復支蓋亦天人之會歟

本紀第九

本紀第十

唐書十

翰林學士兼龍圖閣學士朝散大夫給事知制誥史館脩撰臣歐陽
敕撰

昭宗聖穆景文孝皇帝諱晔懿宗第七子也母曰恭憲皇太后王氏始封壽王乾符三年領幽州盧龍軍節度使僖宗遇亂再出奔壽王握兵侍左右尤見倚信文德元年三月僖宗疾大漸羣臣以吉王長且欲立之觀軍容使楊復恭率兵迎壽王立爲皇太弟改名敏乙巳即皇帝位于柩前四月戊辰孫儒陷揚州自稱淮南節度使楊行密奔于廬州庚午追尊母爲皇太后韋昭度爲中書令孔緯爲司空乙亥張全義陷孟州李罕之奔于河東成汭陷江陵自稱留後辛卯朱全忠及秦宗權戰于蔡州敗之五月壬寅趙德諤以襄州降以德諤爲忠義軍節度使蔡州四面行營副都統六月閬州防禦使王建陷漢州執刺史張頊遂寇成都韋昭度罷爲劍南西川節度副大使兼兩川招撫制置使十月陳敬瑄反辛卯

唐書本紀
葬惠聖恭定孝皇帝于靖陵十一月丙申秦宗權陷許州執忠武軍節度使王縉平西奉國軍將申叢執秦宗權十二月丁亥韋昭度爲行營招討使及永平軍節度使王建討陳畚瑄山南西道節度使楊守厚陷夔州

龍紀元年正月癸巳大赦改元翰林學士承旨兵部侍郎劉崇望同中書門下平章事壬子宣武軍將郭璠殺奉國軍留後申叢自稱留後二月戊辰朱全忠俘秦宗權以獻己丑宗權伏誅三月李緯爲司徒杜讓能爲司空丙申錢鏐陷蘇州逐刺史徐約六月李克用寇邢州昭義軍節度使孟方立卒其弟遷自稱留後楊行密陷宣州宣歙觀察使趙鐔死之廬州刺史蔡儔叛附于孫儒八月甲戌孟遷叛附于李克用十月平盧軍節度使王勣武卒其子師範自稱留後陷棣州刺史張蟾死之宣歙觀察使楊行密陷常州刺史杜陵死之錢鏐陷潤州十一月丁未朝獻于太清宮戊申朝享于太廟己酉有事于南郊大赦十二月孫儒陷常潤二州戊午

孔緯爲太保杜讓能爲司徒壬申眉州刺史山行章叛附于王建
大順元年正月戊子羣臣上尊號曰聖文睿德光武弘孝皇帝大
赦改元壬寅簡州將杜有遷執其刺史貞虔嵩叛附于王建二月
己未資州將侯元綽執其刺史楊戡叛附于建三月戊申昭義軍
節度使李克脩卒其弟克恭自稱留後四月丙辰宿州將張筠逐
其刺史張紹光丙寅嘉州刺史朱實叛附于王建丙子戎州將文
武堅執其刺史謝承恩叛附于建五月張濬爲河東行營都招討
宣慰使京兆尹孫揆副之幽州盧龍軍節度使李匡威爲北面招
討使雲州防禦使赫連鐸副之朱全忠爲南面招討使王鎔爲東
面招討使以討李克用壬寅昭義軍將安居受殺其節度使李克恭
叛附于朱全忠癸丑劍南東川節度使顧彥朗卒其弟彥暉自
稱留後六月辛酉雅州將謝從本殺其刺史張承簡叛附于王建
辛未朱全忠爲河東東面行營招討使是月河東將安知建以邢
洛磁三州叛附于全忠七月楊行密陷潤州戊申李克用執昭義

軍節度使孫揆八月錢鏐殺蘇州刺史杜孺休楊行密陷蘇州淮南節度使孫儒陷潤州庚午朱全忠爲中書令九月李克用陷潞州楊行密陷潤常二州閏月孫儒陷常州王忒邛州將任可知殺其刺史毛湘十月癸未蜀州刺史李行周叛附于王建李克用陷邢洺磁三州十一月丁卯李匡威陷蔚州是月張濬及李克用戰于陰地敗績孫儒陷蘇州十二月李克用陷晉州

二年正月庚申孔緯張濬罷翰林學士承旨兵部侍郎崔昭緯御史中丞徐彥若爲戶部侍郎同中書門下平章事甘露鎮使陳可言陷常州錢鏐陷蘇州二月乙巳赦陳訥瑄丁未詔王建罷兵不受命是春淮南大饑四月庚辰有彗星入于太微甲申大赦避正殿減膳徹樂賜兩軍金帛贖所略男女還其家民年八十以上及疾不能自存者長吏存卹訪武德功臣子孫癸卯王建寇成都五月孫儒陷和滁二州六月楊行密陷和滁二州丙午封子祐爲德王七月李克用陷雲州防禦使赫連鐸奔于退渾孫儒焚楊州以

逃八月庚子王建陷成都執劔南西川節度使陳敬瑄自稱留後
十月壬午朱全忠陷宿州十一月己未曹州將郭銖殺其刺史郭
詞叛附于全忠辛未全忠陷壽州

景福元年正月己未朱全忠陷孟州逐河陽節度使趙克裕丙寅
大赦改元二月劉崇望罷錢鏐陷蘇州甲申朱全忠寇鄆州天平
軍節度使朱宣敗之三月戶部尚書鄭延昌爲中書侍郎同中書門
下平章事乙巳楊行密陷楚州執刺史劉瓚又陷常州刺史陳可
言死之丙辰武定軍節度使楊守忠龍劔節度使楊守貞會楊守
厚兵寇梓州丙寅福建觀察使陳巖卒護閩都將范暉自稱留後
庚午泉州刺史王潮寇福州四月辛巳杜讓能爲太尉六月戊寅
楊行密陷揚州己巳鳳翔隴右節度使李茂貞陷鳳州感義軍節
度使滿存奔于興元遂陷興洋二州八月壬申寇興元楊守亮滿
存奔于閬州丙戌降京畿關輔囚罪免淮南浙西宣州逋負十月
蔡儔以廬州叛附于朱全忠河東將李存孝以邢州叛附于全忠

十一月有星孛于斗牛辛丑武寧軍將張璪張諫以濠泗二州叛
附于朱全忠乙巳朱友裕陷濮州執刺史邵儒孫儒將王壇陷婺
州刺史蔣瓌奔于越州是歲明州刺史鍾文季卒其將黃晟自稱
刺史

二年正月徐彥若罷爲鳳翔隴右節度使李茂貞爲山南西道節
度使茂貞不受命二月楊行密陷常州三月辛酉幽州盧龍軍兵
馬留後李匡篲逐其兄匡威自稱節度留後四月乙亥王建殺陳
敬瑄及劔南西川監軍田令孜乙酉有彗星入于太微丁亥王鎔
殺李匡威戊子朱全忠陷徐州武寧軍節度使時溥死之五月庚
子王潮陷福州范暉死之潮自稱留後七月楊行密陷廬州蔡儔
死之八月丙申嗣覃王嗣周爲京西面招討使神策大將軍李鐔
副之以計李茂貞庚子昇州刺史張雄卒其將馮弘鐸自稱刺史
是月楊行密陷歙州九月壬午嗣覃王嗣周及李茂貞戰于興平
敗績甲申茂貞犯京師乙酉茂貞殺觀軍容使西門重遂內樞密

使李周謹段誦貶杜讓能爲梧州刺史壬辰東都留守檢校司徒
韋昭度爲司徒御史中丞崔胤爲戶部侍郎同中書門下平章事
是月昇州刺史馮弘鐸叛附于場行密十月乙未殺杜讓能及戶
部侍郎杜弘徽楊行密陷舒州十二月韋昭度爲太傅邵州刺史
鄧處訥陷潭州欽化軍節度使周岳死之處訥自稱留後是歲建
州刺史徐歸範汀州刺史鍾全慕叛附于王潮

乾寧元年正月有星孛于鶉首乙丑大赦改元李茂貞以兵來朝
二月右散騎常侍鄭綮爲禮部侍郎同中書門下平章事彰義軍
節度使張鈞卒其兄鐸自稱留後三月甲申李克用寇邢州執李
存孝殺之五月丙子王建陷彭州威戎軍節度使楊晟死之是月
鄭延昌罷孫儒將劉建峯馬殷陷潭州武安軍節度使鄧處訥死
之建峯自稱留後武岡指揮使蔣勛陷邵州六月大同軍防禦使
赫連鐸及李克用戰于雲州死之戊午翰林學士承旨禮部尚書
李磎同中書門下平章事庚申磎罷御史大夫徐彥若爲中書侍

郎同中書門下平章事七月以雨霖避正殿減膳鄭瓘罷李茂貞
陷閬州八月楊守亮伏誅癸巳減京畿興元洋金商州賦役九月
庚申李克用陷潞州昭義軍節度使康君立死之十月丁酉封子
昶爲隸王禩虔王禪沂王禕遂王十一月李克用陷武州十二月
陷新州甲寅幽州盧龍軍節度使李匡籌奔于滄州義昌軍節度
使盧彥威殺之丙辰李克用陷幽州是冬楊行密陷黃州執刺史
吳討

二年正月己巳給事中陸希聲爲戶部侍郎同中書門下平章事
壬申護國軍節度使王重盈卒其子珂自稱留後二月乙未太子
太傅李璣爲戶部侍郎同中書門下平章事三月崔省李璣罷戶
部侍郎判戶部王搏爲中書侍郎同中書門下平章事楊行密陷
濠州執刺史張璠庚午河東地震四月蘇州大雨雪陸希聲韋昭
度罷泰寧軍節度使朱瑾及朱全忠戰于高梧敗績其將安福慶
死之楊行密陷壽州執刺史江從勗五月甲子靜難軍節度使王

行瑜鎮國軍節度使韓建及李茂貞犯京師殺太保致仕韋昭度
太子少師李磎是月李克用陷絳州刺史王瑤死之六月庚寅鎮
海軍節度使錢鏐爲浙江東道招討使癸巳吏部尚書孔緯爲司
空兼門下侍郎同中書門下平章事七月丙辰李克用以兵屯于
河中戊午匡國軍節度使王行約奔于京師庚申左右神策軍護
軍中尉駱全瓘劉景宣指揮使王行實李繼鵬反行在莎城嗣薛
王知柔權知中書事壬戌李克用陷同州甲子次石門前護國軍
節度使崔胤爲中書侍郎同中書門下平章事八月戊戌李克用
爲邠寧四面行營招討使保大軍節度使李思孝爲北面招討使
定難軍節度使李思諫爲東北面招討使彰義軍節度使張鐸爲
西面招討使辛丑李克用爲邠寧四面行營都統李繼鵬伏誅赦
李茂貞辛亥至自石門壬子崔昭緯罷九月丙辰徐彥若爲司空
癸亥孔緯薨前昭義軍節度使李罕之爲邠寧四面行營副都統
十月京兆尹孫偓爲戶部侍郎同中書門下平章事丙戌李克用

及王行瑜戰于梨園敗之庚寅王行約焚寧州以逃義武軍節度使王處存卒其子郃自稱留後十一月丁巳李克用及王行瑜戰于龍泉敗之辛酉衢州刺史陳儒卒其弟岌自稱刺史丁卯王行瑜伏誅壬申齊州刺史朱瓊叛附于朱全忠丁丑王建陷利州刺史李繼顥死之十二月癸未赦京師復大順以來削奪官爵非其罪者甲申閬州防禦使李繼雍蓬州刺史費存渠州刺史陳璠叛附于王建丙申建寇梓州戊戌通州刺史李彥昭叛附于建是歲安州防禦使宣晟陷桂州靜江軍節度使周元靜部將劉士政死之晟自稱知軍府事

三年正月癸丑王建陷龍州刺史田昉死之閏月丁亥果州刺史周雄叛附于建四月壬子武安軍亂殺其節度使劉建峯其將馬殷自稱留後五月癸未楊行密陷蘇州執刺史成及陷光州刺史劉存死之庚寅成汭陷黔州武泰軍節度使王建肇奔于成都乙未董昌伏誅是月蘄州刺史馮行章叛附于楊行密六月庚戌李

茂貞犯京師嗣延王戒不禦之丙寅及茂貞戰于婁館敗績七月
癸巳行在渭北甲午韓建來朝次華州乙巳崔胤罷丙午翰林學
士承旨尚書左丞陸扆爲戶部侍郎同中書門下平章事八月甲
寅王搏罷乙丑國子毛詩博士朱朴爲左諫議大夫同中書門下
平章事九月乙未武安軍節度使崔胤爲中書侍郎翰林學士承
旨兵部侍郎崔遠同中書門下平章事丁酉貶陸扆爲峽州刺史
十月李克用及羅弘信戰于白龍潭敗之壬子孫偓持節鳳翔四
面行營節度諸軍都統招討處置使戊午威勝軍節度使王搏爲
吏部尚書同中書門下平章事十一月戊子忠國軍節度使李師
悅卒其子繼徽自稱留後

四年正月乙酉韓建以兵圍行宮殺扆蹕都將李筠丙申朱全忠
陷鄆州天平軍節度使朱宣死之己亥孫偓罷都統二月朱全忠
寇兗州泰寧軍節度使朱瑾奔于淮南其子用貞以兗州叛附于
全忠全忠陷沂海密三州保義軍節度使王珙寇河中韓建殺太

子詹事馬道殷將作監許巖主楊行密爲江南諸道行營都統癸丑王建陷廬州刺史馬敬儒死之己未立德王裕爲皇太子大赦饗于行廟辛未王建陷渝州乙亥孫偓朱朴罷五月壬午朱全忠陷黃州刺史聶璋死之六月貶王建爲南州刺史以李茂貞爲劔南西川節度使嗣覃王嗣周爲鳳翔隴右節度使茂貞不受命嗣周及茂貞戰于奉天敗績八月韓建殺通王滋沂王禪詔王彭王嗣韓王嗣陳王嗣覃王嗣周嗣延王戒丕嗣丹王允九月錢鏐陷湖州忠國軍節度使李繼徽奔于淮南彰義軍節度使張璉爲鳳翔西北行營招討使靜難軍節度使李思諫爲鳳翔四面行營副都統以討李茂貞十月壬子遂州刺史侯紹叛附于王建乙卯合州刺史王仁威叛附于建庚申建陷梓州劔南東川節度使顧彥暉死之甲子封子祕爲景王祚輝王祺祁王十一月癸酉楊行密及朱全忠戰于清口敗之丙子錢鏐陷台州十二月丁未威武軍節度使王潮卒其弟審知自稱留後

光化元年正月徐彥若爲司徒二月赦李茂貞三月幽州盧龍軍
節度使劉仁恭之子守文陷滄州義昌軍節度使盧彥威奔于汴
州四月丙寅立淑妃何氏爲皇后五月己巳大赦辛未朱全忠陷
洛州刺史邢善益死之又陷邢州壬午陷磁州刺史素奉韜死之
是月馬殷陷邵衡永三州刺史蔣勛楊師遠唐旻死之七月丙申
朱全忠陷唐州又陷隋州執刺史趙匡璘八月戊午陷鄧州執刺
史國湘壬戌至自華州甲子大赦改元九月丙子有星隕于北方
甲申錢鏐陷蘇州十月魏博節度使羅弘信卒其子紹威自稱留
後己亥朱全忠陷安州刺史武瑜死之十一月衢州刺史陳岌叛
附于楊行密甲寅封子禎爲雅王祥瓊王十二月癸未李罕之陷
潞州自稱節度留後李克用陷澤州

二年正月乙未給復綿劍三州二年丁未崔涓罷兵部尚書陸扈
同中書門下平章事是月李罕之陷沁州劉仁恭陷貝州二月甲
子朱全忠陷蔡州奉國軍節度使崔洪奔于淮南三月丁巳全忠

陷澤州六月丁丑保義軍亂殺其節度使王珙其將李璠叛附于全忠七月壬辰海州戎將陳漢賓以其州叛附于楊行密馬殷陷道州刺史蔡結死之八月李克用陷澤潞懷三州十一月徐彥若爲太保王搏爲司空馬殷陷郴連二州刺史陳彥謙魯景仁死之辛丑保義軍將朱簡殺其節度使李璠叛附于朱全忠

三年四月辛未皇后及皇太子享于太廟六月丁卯清海軍節度使崔涓爲尚書左僕射兼門下侍郎同中書門下平章事王搏罷己巳殺之七月浙江盜八月庚辰李克用陷洛州執刺史朱紹宗九月朱全忠陷洛州錢鏐陷婺州刺史王壇奔于宣州衢州刺史陳岌叛附于錢鏐乙巳徐彥若罷丙午崔遠罷戊申刑部尚書裴贇爲中書侍郎同中書門下平章事甲寅朱全忠陷瀛州十月丙辰陷景州執刺史劉仁霸辛酉陷莫州辛巳陷祁州刺史楊約死之甲申陷定州義武軍節度使王郛奔于太原十一月己丑左右神策軍中尉劉季述王仲先內樞密使王彥範薛齊偓作亂皇帝

居于少陽院辛卯季述以皇太子裕爲皇帝丁未太白晝見十二月劉季述殺睦王倚是歲馬殷陷桂宜巖柳象五州睦州刺史陳晟卒其弟詢自稱刺史

天復元年正月乙酉左神策軍將孫德昭董彥弼周承誨以兵討亂皇帝復于位劉季述薛齊偓伏誅降封皇太子裕爲德王戊申朱全忠陷絳州壬子崔胤爲司空朱全忠陷晉州二月甲寅以旱避正殿減膳戊辰朱全忠陷河中執護國軍節度使王珂辛未封全忠爲梁王是月翰林學士戶部侍郎王溥爲中書侍郎吏部侍郎裴樞爲戶部侍郎同中書門下平章事三月辛亥昭義軍節度使孟遷叛附于朱全忠四月壬子全忠陷沁澤二州丁巳儀州刺史張鄂叛附于全忠甲戌享于太廟丙子大赦改元武德貞觀配饗功臣主祭子孫敘進之介公儼公後子一子九品正員官免光化以來畿內逋負五月李茂貞來朝六月李克用陷隰慈二州十月戊戌朱全忠犯京師十一月己酉陷同州壬子如鳳翔丁巳朱

全忠陷華州鎮國軍節度使韓建叛附于全忠辛酉兵部侍郎盧光啓權勾當中書事癸亥李茂貞及朱全忠戰于武功敗績丁卯盧光啓爲右諫議大夫參知機務戊辰朱全忠犯鳳翔辛未陷邠州靜難軍節度使李繼徽叛附于全忠甲戌崔胤裴樞罷十二月鍾傳陷吉州是歲清海軍節度使徐彥若卒行軍司馬劉隱自稱留後武貞軍節度使雷滿卒其子彥威自稱留後

二年正月丁卯給事中韋貽範爲工部侍郎同中書門下平章事丙子給事中嚴龜爲汴岐和協使二月己亥盜發簡陵王建陷利州昭武軍節度使李繼忠奔于鳳翔三月庚戌晝晦癸丑朱全忠陷汾州乙卯浙西大雨雪戊午朱全忠陷慈隰二州丁卯李克用陷汾慈隰三州四月盧光啓罷丙申溫州刺史朱褒卒其兄教自稱刺史楊行密陷昇州五日丙午李茂貞及朱全忠戰于武功敗績庚午韋貽範罷六月丙子中書舍人蘇檢爲工部侍郎同中書門下平章事丙戌朱全忠陷鳳州七月甲辰陷成州乙巳陷隴州

八月己亥韋貽範起復辛丑王建陷興元山南西道節度使王萬弘叛附于建九月戊申李茂貞及朱全忠戰于槐林敗績武定軍節度使拓拔思恭叛附于王建十月癸酉楊行密爲東面諸道行營都統及湖南節度使馬殷討朱全忠王建陷興州十一月癸卯保大軍節度使李茂勳以兵援鳳翔丙辰韋貽範薨十二月癸巳溫州將丁章逐其刺史朱敖己亥朱全忠陷鄜州保大軍節度使李茂勳叛附于全忠是歲盧光稠陷韶州岳州刺史鄧進思卒其弟進忠自稱刺史

三年正月丙午平盧軍節度使王師範取兗州戊申殺左右神策軍護軍中尉韓全誨張彥弘內樞密使袁易簡周敬容辛亥翰林學士姚洎爲汴岐和協使壬子工部尚書崔涓爲司空兼門下侍郎同中書門下平章事申子幸朱全忠軍已已至自鳳翔哭于太廟大赦庚午崔涓及朱全忠殺中官七百餘人辛未涓判六軍十二衛事丁章伏誅二月雨土甲戌貶陸扆爲沂王傅分司東都丙

子王溥罷朱全忠殺蘇檢吏部侍郎盧光啓戊寅降京畿河中鳳翔興德府同鄆鄜三州死罪以下己卯輝王祚爲諸道兵馬都元帥庚辰朱全忠爲太尉中書令副之崔胤爲司徒乙未清海軍節度使裴樞爲門下侍郎同中書門下平章事三月朱全忠陷青州楊行密陷密州刺史劉康乂死之四月己卯朱全忠判元帥府事五月壬子荆南節度使成汭及楊行密戰于君山死之武貞軍節度使雷彥威之弟彥恭陷江陵六月乙亥朱全忠陷登州九月楊行密殺奉國軍節度使朱延壽辛亥朱全忠陷棣州刺史邵播死之陷密州戊午平盧軍節度使王師範叛附于全忠十月忠義軍將趙匡明陷江陵自稱留後王建陷忠萬施三州甲戌陷夔州丁丑平盧軍將劉鄩以兗州叛附于朱全忠十二月裴贄罷楊行密陷宣州寧國軍節度使田頔死之辛巳禮部尚書獨孤損爲兵部侍郎同中書門下平章事丙申朱全忠殺尚書左僕射致仕張濬天祐元年正月乙巳崔胤罷裴樞判左三軍事獨孤損判右三軍

事兵部尚書崔遠爲中書侍郎翰林學士右拾遺柳璨爲右諫議大夫同中書門下平章事己酉朱全忠殺太子少傅崔涓及京兆尹鄭元規威遠軍使陳班戊午全忠遷唐都于洛陽二月丙寅日中見北斗戊寅次陝州朱全忠來朝甲申封子禎爲端王祁豐王福和王禧登王祐嘉王三月丁未朱全忠兼判左右神策及六軍諸衛事閏四月壬寅次穀水朱全忠來朝甲辰至自西都享于太廟大風雨土乙巳大赦改元六月靜難軍節度使楊崇本會李克用王建兵以討朱全忠七月乙丑全忠以兵屯于河中八月壬寅全忠以左右龍武統軍朱友恭氏叔琮樞密使蔣玄暉兵犯宮門是夕皇帝崩年三十八明年起居郎蘇楷請更諡恭靈莊閔廟號襄宗至後唐同光初復故號諡云昭宣光烈孝皇帝諱祝昭宗第九子也母曰皇太后何氏始封輝王朱全忠已弒昭宗矯詔立爲皇太子監軍國事天祐元年八月丙午即皇帝位于柩前衢州刺史陳璋睦州刺史陳詢叛附于楊行密九月庚午尊皇后爲皇太

后十月辛卯朔日有食之癸巳朱全忠來朝甲午全忠殺朱友恭氏叔琮十一月全忠陷光州是歲虔州刺史盧光稠卒衙將李圖自稱知州事

二年正月盧約陷溫州楊行密殺平盧軍節度使安仁義丁丑盜焚乾陵下宮二月楊行密陷鄂州武昌軍節度使杜洪死之戊戌朱全忠殺德王裕及棣王珣虔王禕遂王禕景王祕祁王祺瓊王祥已酉葬聖穆景文孝皇帝于和陵三月甲子裴樞罷戊寅獨孤損罷禮部侍郎張文蔚同中書門下平章事甲申崔遠罷吏部侍郎楊涉同中書門下平章事四月乙未以旱避正殿減膳庚子有彗星出于西北甲辰出于北河辛亥降京畿死罪以下給復山陵役者一年五月王建陷金州戎昭軍節度使馮行襲奔于均州六月行襲克金州楊行密陷婺州執刺史沈夏戊子朱全忠殺裴樞及靜海軍節度使獨孤損左僕射崔遠吏部尚書陸扈工部尚書王溥司空致仕裴贄檢校司空兼太子太保致仕趙崇兵部侍

郎王贊七月卜郊岳州刺史鄧進忠叛附于馬殷九月甲子朱全忠陷襄州忠義軍節度使趙匡凝奔于淮南丙寅封弟禔爲潁王祐蔡王朱全忠陷江陵留後趙匡明奔于成都乙酉改卜郊十月丙戌朱全忠爲諸道兵馬元帥十一月庚午三卜郊庚辰淮南節度使楊行密卒以其子渥爲淮南節度副大使東面諸道行營都統辛巳朱全忠爲相國揔百揆封魏王十二月乙未全忠爲天下兵馬元帥殺蔣玄暉及曹德庫使應瑱尚食使朱建武癸卯柳璨爲司空戊申朱全忠弑皇太后辛亥罷郊癸丑貶柳璨爲登州刺史甲寅殺璨及太常卿張廷範

三年正月壬戌淮南將王茂章以宣歙二州叛附于錢鏐二月楊渥陷岳州癸巳王建陷歸州四月癸未朔日有食之鎮南軍節度使鍾傳卒其子匡時自稱留後六月錢鏐陷衢睦二州刺史陳璋陳詢奔于淮南七月楊渥陷饒州八月癸未朱全忠陷相州九月楊渥陷洪州執鍾匡時乙亥匡國軍節度使劉知俊陷坊州執刺

史劉彥暉十月辛巳楊崇本會鳳翔涇原鄜延秦隴兵以討朱全忠戰于美原敗績十一月忠國軍節度使高彥卒其子澧自稱留後閏十二月戊辰李克用陷潞州昭義軍節度使丁會叛附于克用乙亥震電雨雪

四年三月劉守光囚其父仁恭自稱幽州盧龍軍節度使四月戊午錢鏐陷溫州甲子皇帝遜于位徙于曹州號濟陰王梁開平二年二月遇弑年十七諡曰哀帝後唐明宗追諡昭宣光烈孝皇帝陵曰溫陵

贊曰自古亡國未必皆愚庸暴虐之君也其禍亂之來有漸積及其大勢已去適丁斯時故雖有智勇有不能為者矣可謂具不幸也昭宗是已昭宗為人明雋初亦有志於興復而外患已成內無賢佐頗亦慨然思得非常之材而用匪其人徒以益亂自唐之亡也其遺毒餘酷更五代五十餘年至於天下分裂大壞極亂而後止跡其禍亂其漸積豈一朝一夕哉

本紀第十

卷一百一十五

後唐紀

後唐紀

後唐紀

後唐紀